

PAOT TE HŌM YŌG KUXA MĀM KA'OK XOP PU KAX'ĀMI'

¹ Ūgmūn yā Paot, Yeyox Kunnix tu hāpxopmāhā', ha Topa tek yāyikutnāhā', tuk xānāhā', nūy mōgkutnā', 'āte hām'apak max'ax 'āktux, hu xa kax'āmi nūhū tappet.

² Hōmā, hāmyāxatamuk xohix 'ihā Topa te mōnāyxop hittap pu hām'āktux xex, ha Topa yōg pupi hām'āktux xop hittap te' xuktux, tu tappet tu kax'āmi', hu: “Topa te tik xop mō' pok putup, pu xa hām'āpak max'ax 'āktux,” kaxīy. ³ Yīy Topa tappet te Topak-tok 'āktux, tu yūmūg xuxyā Yeyox Kunnix 'āktux, hak mū yōg tikmū'ūn kutok pit, yā mōnāyxop hittap Namix mōkputox Yeyox. ⁴ Tu' max xe'ēgnāg, Topa putuk tu', yā Topak-tok xe'e', tu' xok xe'e', yīy Topa te hāpxopmā ka'ok xe'ēgnāg, tu' hīnnāhā putpu', pu' xohix yūmmūg, yā Yeyox mūn Topa hāk-tok. ⁵ Yā Topa tek yāyikutnāhā', nūy nūgkutnā', tu 'ā yāy 'āxet'ax hōm 'ū puknōg xop xohix kuxa māmā kamah, pu tu' yīpkox pi hām'āpak max'ax pu', ⁶ ha 'āxop kuxa mām ka'ok kamah, kōmēn Hōm tu 'āpip, ha Topa te 'āxānāhā', xa Yeyox Kunnix hā 'āxape'.

⁷ Kaxīy 'āte kax'āmi tappet, tu kōmēn Hōm yōg kuxa mām ka'ok xop pu ka'āmi', yā Topa te mō 'āxop yāy xe'ēgnāg, tu 'āxop xānāhā', xayīy yāyhā' yōg tikmū'ūn.

Pūyā Topa yūmūg Tak xik-tok Yeyox Kunnix xa hāmmaxnā', xix 'ākuxa māmā'.

Paot te Topa pu hām'āktux, tu' max 'āktux

⁸ Āte Topa pu hām'āktux pax hāmāxap, hu: Āmax, Topah! kaxīy. Tu Yeyox Kunnix hā' xuktux, tu xa hāk hittup kamah. Yā hām xexka xohix yōg tikmū'ūn xa hām'āktux max, 'ākuxa mām ka'ok hah. ⁹ Topa tu 'āte hāpxopmāhā, nūy mīy māynāg, tu hām'āpak max'ax 'āktux, tu Topak-tok 'āktux, ha' yūmmūg Topa te', tu 'āte hāpxe'e 'āktux yūmmūg. 'Ap 'āte koit'ah, yā 'āxaxok 'ohnāg. ¹⁰ Tu Topa tu' xak pax, puyīy ka'ogā', tu' xak kamah, pu tu mōgkutnā 'āhah, yā Topa te mō yūmūg yāy xe'ēgnāg. ¹¹ Āhak mōg putup pax. 'Āte' xak, 'ūyīy 'āhak mōg, nūy xa hāmmax nā', nūy 'āka'ogā' ¹² pu yūmūg xohix mō' yāy nīynām: 'Āxop te mōgnīynām, xik mūn te mō'ānīynām, hu Topa yōg putat hā yūmūg mōg kumak mōg.

¹³ Ūkxape xop, 'āte xa hām'āktux xe'e': 'Ūgmōg putup 'āhah, yā 'āmnīy xohix hāk mōg putup, pak mōg 'ohnāg. 'Āhak mōg, 'okpa 'āte' xak, nūy kama 'āmōgā'. Hōmā 'āte' puknōg xop mōgāhā', nōm xop te Yoneo yōg tikmūn'ūn hā' puknōg, Topa yōg putat hā' mōgāhā', yā kaxīy 'āte' xak, nūy 'āmōgā kamah. ¹⁴ Topa te mōgkutnāhā, 'āte hām'āpak max'ax 'āktux, huk yīy hok'ah. Yā hām'āktux putup Yoneo yōg tikmū'ūn pu', xix puknōg xop xohix pu'. 'Āte ta nemēn, nūy hām'āpak max'ax 'āktux 'ūxohix pu'. 'Ap tayūmak ta nemēn'ah. Yā' nōy, yīy hāmyūmmūg xop pu 'āte hām'āktux, xix hāmyūmmūg 'ohnāg xop pu 'āte hām'āktux kamah, tu hām'āpak max'ax 'āktux putup 'ūxohix pu', ¹⁵ xix 'āxop pu' xuktux'ax kamah, ha kōmēn xexka Hōm tu 'āpip, yīk mōg putup 'ōgnū kōmēn Hōm tu', nūy xa hām'āktux hām'āpak max.

Hām'āpak max'ax mūn ka'ok

¹⁶ Topa tek xat 'āte hām'āpak max 'āktux, pu tikmū'ūn kuxa mām ka'ok Yeyox Kunnix kopah, pu tu' kuxa kummuk xit, nūy kuxa max tat 'ūyānān tu'. Yā hām'āpak'ax ka'ok, ha 'āte yāyhāhup 'ohnāg, nūy hām'āpak max'ax 'āktux. Ha Yoneo xop te hām'āpak hāmāxap, yā hām'āpak'ax ka'ok, tu Yoneo yōg tikmū'ūn kuxa kummuk xit, xix yā' puknōg xop kuxa xit kamah, nūy kuxa max tat 'ūyānān tu', yā' nōy putuk. ¹⁷ Topa tep-tup, pu tikmū'ūn kuxa mām ka'ok Yeyox Kunnix kopah. Puxi', ha nōm tikmū'ūn mō'yāy xe'ēgnāg. Yā hām'āpak max xe'e'! Hōmā tik te Topa pupi hām'āktux, tu tappet tu kax'āmi', nūy tikmū'ūn pu' xuktux, hu: “Tikmū'ūn kuxa yūm ka'ok Topa kopah, puxix Topa' kuxa kummuk tupmā', pu tu max, puyīy tikmū'ūn hi xe'ēgnāg,” kaxīy.

Yā' hep xop xohix te hāpxopmā kummuk

¹⁸ Topa gāy tikmū'ūn kuxa kummuk hah, yūmū'āte' yūmmūg, yā Topa tep-tup hok, pu tikmū'ūn hāpxopmā kummuk hok. Yā tikmū'ūn te hāpxopmā kummuk pax, tu Topa hā' puknōg, puxi' nōy Topa yūmmūg hok kamah. ¹⁹ Ha Topa gāy, tu' yānān tu' kummugāhā, tu' xūygāhā', tu nōm tikmū'ūn pu hāmyūmmūgā tap, 'ūkuxa kopa' yūmmūgāhā', puyīy tikmū'ūn Topa yūmmūg max, ²⁰ 'ihā' pēnā hok, ha hāmnōgnōy mīy, xix hahām, ha tikmū'ūn xop xohix te hāmnōgnōy pēnāhā', xix hahām, tu Topa te' mīy yūmmūg, hu Topa xexka xe'ēgnāg yūmmūg, xix Topa ka'ok xe'ēgnāg yūmmūg, xix Topa xok hok yūmmūg. Tep te xīy tikmū'un te Topa yūmmūg hok? Yā Topa hi

xe'ëgnäg. ²¹ Yã hãmyümmüg, päyã tikmü'ün te Topa xaxok, tu nôm pu hãm'äktux 'ohnäg, hu: “Äxexka Topah, xix 'ãmax, xatek mü'ã hãpxop xohix popmãhã,” kaxïy. 'Ämhok, 'ap xuktux'ah, pap-tox kummuk, tu hãmp'e'paxex 'ohnäg, tu mõktu hãmyümmüg 'ohnäg, 'ükummuk tu'. ²² Tu yãy hãmyümmüg pe'paxex, 'ühitop tu hãmp'e'paxex, 'üpa te hãmyümmüg 'ohnäg tu', tup-tox kummuk. ²³ Yã Topa hi xe'ëgnäg, pa tikmü'ün te nïm, nÿy topa komut xop pu nÿktetex 'üyãnãn tu', ha' komut xop te tikmü'ün putuk, xix putuxnäg putuk, xix xokxop putuk, xi' kep hã' mõg xop putuk.

²⁴ Yïy Topa te tikmü'ün putox kummuk xop nïm, pu yãy putup'ax mïy, hu hãpxopmã kummuk, tu yãy kummugãhã', ²⁵ tu Topa nïm, tu hãpxop pu nÿktetex 'üyãnãn tu', nôm hãpxop Topa te' mïy, ha Topa xe'ëgnäg nïm, tu' xaxok, nÿy 'ükoit'ãx putup 'üyãnãn tu', pa Topa mÿn max, tu' hi xe'ëgnäg, ha' nõg 'ohnäg. Hamÿn!

²⁶ Yïy Topa te' nïm, ha hãpxopmã kummuk, tu' nõy pu' hupmãhã', ha 'ün xop te 'ün nõy pãnãhã', nÿy nÿ mÿtik tu yãyhã' xupxet, ²⁷ ha tik xop te tik nõy pãnãhã', nõ mõ'ãmã, nÿy nÿ mÿtik tu nôm kummuk, tu 'ün putup nõg, pu nÿ mÿtik tu nôm, pa tik xop putup, yã' kummuk, hu yãy pu hãpkummugãhã', yïy Topa te' kummugãhã', ha' pago.

²⁸ Tikmü'ün kummuk te Topa xaxok, tu hãmyümmüg putup 'ohnäg, yïy Topa te' nïm, pu hãmp'e'panôm kummuk, nÿy hãpxopmã kummuk. ²⁹ Yã' kummuk xe'ëgnäg, 'üxonnix, tu' xupkumïy nãm, tu' nõy pe'paxex kummuk, tu' nõy pu

hãpkummugãhã', tu' yĩpkumĩy, tu' yãykix, tu' nõy putex, tu' yãy tuk-mĩy, tu' koit, tu' xupmãhĩy kummuk pax,³⁰ tu' nõy 'ãktux kummuk, tu' Topap-tup nõg, tu' yãy mũn pe'paxex xexka', 'ĩhã' nõy pe'paxex kutõgnãg, tu' hãpkummuk mĩ'ax xak, tu' yãy tak xi' tut pu' yĩpkox 'ohnãg,³¹ tu' hãpkummuk mĩy pax, tu' hãm'ãktux xex, pãyã' xaxok, hu' hitop tu' xex, yã' mĩy 'ohnãg, tu' nõy kuxa ka 'ohnãg.³² Tu' Topa yõg xat'ax yũmmũg, ha' xat hok pu' mĩy hok, ka' Topa te: "Pũyã tu' xok 'ũyãnãn tu'," kaxĩy, pa' yĩpkox 'ohnãg, tu' hãpkummuk mĩy pax, tu' nõy xop pu' hãpkummuk yũmmũgãhã', yã' nõy xapit, puyĩy hãpxopmã kummuk kamah.

2

Topa te hãpkummuk mĩy ha' pago

¹ 'Ok 'ãxop te 'ãnõy yõg hãpxopmã'ax kopit? Yã' kummuk 'ãktux, pa' 'ãxop te hãpkummuk mĩy 'ãnõy putuk, hu' yãy yõg hãpxopmã'ax kopit'ax kamah. Yã' 'ãtix kummuk. Tep te xĩy 'ãxop kama hãpkummuk mĩy? ² Topa mũn max, ha' yũmũ'ãte' yũmmũg, ha' kopit max, tu' xat hok puyĩ' xohix hãpkummuk mĩy hok, ha' kummugãp-tup 'ũyãnãn tu'. ³ Pa' 'ãxop te hãpxopmã kummuk, 'ĩhã' 'ãnõy tu: "'Ûmĩy hok' Yã Topa tep-tup nõg hãpxopmã'ax kummuk, hu' 'ãxũygãp-tup," kaxĩy. 'Ok xate hãmp'e'ãpaxex, hu: "Topa tekmũn pẽnã'ah?" Kaxĩy. Yã' koit! Yã' pẽnãhã'! 'Ûxohix te Topa pu' yãy putuk, yĩy Topa te yã 'õg hãpxopmã'ax kopit putup kamah, tu' 'õg hãpkummuk mĩy'ax hã 'ãxũygãp-tup. ⁴ Topa pe'ãpaxek-tõgnãg hok! Yã' max xe'ẽgnãg Topa, tu' hip, xayĩ pẽnã', nõy yãyhãhup, nõy

hāpkummuk mīy'ax nīm. Yā 'āxop te hāmyūmmūg.
⁵ Āyīpkox hok, puxix Topa 'āxūygā, 'āxūy kutōgnāg
nā' mōg, tu mōktu 'āxūy xexka, 'īhā Topa te'
hep xop xohix yōg hāpxopmā'ax kopit, pu' xohix
hāmyūmmūg; Yā Topa te hāmyok mīy,⁶ tu' xohix yōg
hāpxopmā'ax yūmmūg, tu pagop-tup 'ūyānān tu',
yā tikmū'ūn te hāpxopmā kummuk, puxix Topa'
kummugā', ha tikmū'ūn te hāpxopmā max, puxix
Topa hāmmaxnā'.⁷ Tikmū'ūn yāg te' xak, nūy
hāpxopmā max, xi' xak, nūy tu max xe'ēgnāg, Topa
putuk, xi' xak, pu Topa te: “Āxop yā yōgnū'!”
kaxīy. Tu hāmmax hip, yīy nōm xop hīnnāp-tup
xe'ēgnāg nūy Topa mūtik tu tihi'.⁸ Pa tikmū'ūn
nōy te yāy pe'paxex puxet, nūy yāy putup'ax mīy,
xix hāpxe'ep-tup nōg, nūy hāpxopmā kummuk pax,
ha Topa gāyāhā', ha hāpkummugāp-tup 'ūyānān
tu', nūy pago.⁹ Tikmū'ūn xohix te hāpxopmā
kummuk, puxix Topa' yānān tu' xūygā', yōgnū
Yoneo yōg tikmū'ūn hāmāxap, hak-nāy tu' puknōg
xop xūygā'.¹⁰ Tu tikmū'ūn max pu hāmmaxnāp-
tup 'ūyānān tu', pu tu yāyhā max xe'ēgnāg, Topa
putuk, ha' xekānāp-tup, xi' kuxa māp-tup. Yā
hāmmaxnāp-tup 'ūyānān tu', tu Yoneo yōg tikmū'ūn
pu hāmmax nāp-tup hāmāxap, xik-nāy tu' puknōg
xop pu hāmmaxnāp-tup.¹¹ Yā Topa pu 'ūhep xo-
hix te yāy putuk, tu hāpxopmā'ax xohix kopit nūy
yūmmūg, 'ok pe hāpxopmā max, pe tu kummuk,
nūy tu pago.

¹² Hām puknōg xop te Mōyyex yōg xat'ax yūmmūg
hok, tu hāpxopmā kummuk, ha Topa te' yōg
hāpxopmā'ax kopit, tu tikmū'ūn yāy xat'ax hā' ko-
pit, 'īhā' xat'ax yūmmūg 'ohnāg, ha: “Ūkummuk!”

kaxīy. Ha Yoneo yōg tikmū'ūn te Mōyyex yōg xat'ax yūmmūg, tu hāpxopmā kummuk, puxix Topa' yōg hāpxopmā'ax kopit, tu yāy yōg xat'ax hā' kopit, hu: “Ūkummuk!” kaxīy. ¹³ Tikmū'ūn te hāpxopmā max, puxix Topa tep-tup pax, 'ok pe' xat'ax yūmmūg, 'ok pe' xat'ax yūmmūg hok, ha tikmū'ūn te hāpxopmā kummuk, puxix Topa tep-tup nōg, 'ok pe' xat'ax yūmmūg, 'ok pe' xat'ax yūmmūg hok. ¹⁴ Hām puknōg xop te Mōyyex yōg xat'ax yūmmūg'ah, pa' puknōg te hāpxopmā max, puxix tu' mīy, Topa yōg xat'ax mīy, 'ihā' yūmmūg hok. ¹⁵ 'Ūyūmmūg. Topa te yāy yōg xat'ax yūmmūgāhā', nōm xop kuxa kopa' yūmmūgāhā', yī' kuxa kopa' yūmmūg, 'ok pe hāpxopmā max, 'ok pe' kummuk. ¹⁶ Hāptup puxet mō'nā'ax, 'ihā Topa te Yeyox xat, pu tikmū'ūn xop xohix yōg hāpxopmā'ax kopit, nūy hāmpe tu panōm yūmmūg, nūy hāmpe tu pānōm xaptop'ax xohix yūmmūg, ha 'āte hām'āpak, max'ax hā hām'āktux, yā Topa te hāmpe'pānōm xohix kopit putup, tu hām'āpak max'ax hā' kopit putup.

Yoneo xop xix Mōyyex yōg xat'ax

¹⁷ Ha 'āxop te: “Ūgmū'ūg Yoneo xop yōg,” kaxīy. 'Ākuxa mām ka'ok Mōyyex yōg xat'ax kopah, mōnāyxop hittap Mōyyex te kax'āmi', ha 'ākuxa mām ka'ok nō'ōm kopah, tu: “Ūgmū'ūg yā Yoneo xop yōg, ha Yoneo yōg tikmū'ūn yā Topa hā tikmū'ūn xe'e,” kaxīy. Yā' hitop tu yāy mūn xexka pe' āpaxex. ¹⁸ Tu Topa yōg putup'ax yūmmūg, xayī' mīy māynāg. Tu hāmmax'ax yūmmūg, xayīy hāpxopmā max. Pāyā hitop tu hāmyūmmūg, ¹⁹ hu yāy pe'āpaxex hitop, hu: “Āte hāmyūmmūg, hu

hāmyūmmūg hok xop pu hāmyūmmūgā'ax," kaxīy.
 20 'Ākuxa mām ka'ok 'ūxat'ax kopah, yā hāmmax
 xohix yūmmūgāhā', xix hāpxe'e yūmmūgāhā', yīy
 'āxop te' tuktup xop pu hāmyūmmūgā'ax, xix
 hāmyūmmūg hok xop pu hāmyūmmūgā'ax. 21 Pāyā
 yāy pu hāmyūmmūgā'ax xate' xaxok, tu Topa yōg
 hām'āktux 'āktux, pāyā' mīy 'ohnāg. 'Āxop te:
 "Āxupxet hok!" kaxīy, tu 'ānōy pu' xat, pu tu'
 xupxet hok, 'īhā xate' xupxet. 22 Tu' xat hok, pu'
 nōy hā' xupxet hok, pa 'āxop te 'ānōy hā' xupxet
 kamah. Tu topa komut xop putup nōg, pāyā
 topa komut pet tu xate' xupxet, nūy puknōg xop
 gāyā'. Yā 'ākummuk! 23 'Āxop te yāymūn xexka
 pe'āpaxex, Topa te xa' hōm yāy xat'ax hah, pāyā 'a'
 mīy'ah, 'āyīpkox 'ohnāg tu', yī' puknōg xop te Topa
 'āktux kummuk, yā 'āxop te Topa pu' hupmāhā', ha'
 yāyhāhup. 24 Topa yōg tappet te: "Ūpuknōg xop te
 Topa 'āktux kummuk, 'āxop Yoneo xop te hāpxopmā
 kummuk hah," kaxīy.

25 Yoneo yōg yūmūg tikmū'ūn te kakxop pit
 xop yāy nāg xax yīmap tu' mep, puyīy tikmū'ūn
 te hāmyūmmūg. Yā Topa yōg tikmū'ūn xe'e'.
 Yoneo xop te' xat'ax pu' yīpkox pīp, puxix tu max,
 pa' yīpkox hok, puxix yāy xax mep 'ūhitop tu'.
 26 Ūpuknōg xop te' xat'ax pu' yīpkox pi', puxix
 tu Topa hā tikmū'ūn xe'e', 'īhā yāy xax yīmap
 mep 'ohnāg. 27 Ha kaxīy puknōg xop te yūmūg
 yōg hāpxopmā'ax kopit putup, nūy hāpxopmā'ax
 yūmmūg, tu yāy xax yīmap tu' mep 'ohnāg, pāyā
 Topa yōg xat'ax pu' yīpkox pīp, nūy hāpxopmā
 max, pa yūmū'āte Topa yōg xat'ax yūmmūg max,
 tu' pit xop yāy xax mep, pāyā' yīpkox hok, tu

hāpxopma kummuk, puxi' puknōg xop te yūmū yōg
 hāpxopmā'ax kopit putup. ²⁸ Yoneo yōg tikmū'ūn
 yā Topa yōg tikmū'ūn xe'e'. Piyā' Yoneo xop yōg?
 Tikmū'ūn te xīy yā Topa yōg xe'e'? Tikmū'ūn te'
 xax xak puxet, tu yāyhā 'ohnāg Topa yōg tikmū'ūn.
 'Āmhok. ²⁹ Pa tikmū'ūn kuxa te Topa xak, nō'ōm
 te Yoneo xop yōg xe'e', ha Topa Koxuk te' kuxa
 tupmāhā, pu tu Topa hā tikmū'ūn, 'ūxat'ax te' mīy
 hok hah. Yā Topa tep-tup, tu' max 'āktux. 'Ap
 tikmū'ūn nōy te hām'āktux'ah.

3

¹ Tikmū'ūn 'ūm te' yīkopit, hu: “Ok max 'ūgmūn
 yā Yoneo xop yōg?” kaxīy. Xix: “Ok max Yoneo
 xop pit yāy nāg xax yīmap nūy xak?” kaxīy. ² Yā'
 max xe'e'. Topa tek mū yōg Yoneo xop pu yāy
 yōg hām'āktux 'āktux, 'ūyīy tu xeh max. ³ Tikmū'ūn
 'ūm te hām'āktux, hu: “Pa Yoneo yōg tikmū'ūn
 punethok yīpkox pip 'ohnāg, tu Topa yōg hām'āktux
 pu' yīpkox 'ohnāg,” kaxīy. 'A' yūmmūg, pa Topa mūn
 max, tu Yoneo yōg tikmū'ūn pu hām'āktux xex, tu'
 xaxok 'ohnāg. ⁴ Hamūn! Topa te hāpxe'e 'āktux,
 tu hāmyok mīy, tu' koit 'okpa tikmū'ūn xohix te
 mō'āmā', yīy Topa tappet te:
 “Yā Topa te hāmyok mīy, tu hāpxe'e 'āktux,
 tu' koit 'ohnāg,
 pu' pa te hāmyūmmūg xe'e' yīkopit, tu: 'Ūmax,”
 Kaxīy.

⁵ Yūmū'āte hāpxopmā kummuk, kopxix tikmū'ūn
 nōy pu Topa mūy, yā hāmyok mīy Topa te', ha
 yūmū yōg hāxopmā'ax kummuk hā yūmū'āte
 hāmyūmmūgāhā'. Yā tikmū'un punethok te hitop
 tu hām'āktux, hu: “Pūyā Topa 'ūgkummugā hok, nūy

yūmū yōg hāpkummuk mīy hā' pago', 'Ap max'ah Topa 'ūgkummugā'! Kaxīy. ⁶ Nāy, Topap-xehnāg te hāmyok mīy' Yā Topa mūn pa te hāmyūmmūg xe'ēgnāg, nūy tikmū'ūn xop xohix yōg hāpxopmā'ax kopit, xi' hep xop xohix yōg hāpxopmā'ax kopit. Paxpu Topa hāpxopmā kummuk, puxix tu tikmū'ūn xohix yōg hāpxopmā'ax kopit hok.

⁷ Āte xe hām'āktux, hu: Yāk mūn te koit, pāyā Topap-xehnāg te koit 'ohnāg. Tikmū'ūn xohix te yā koit pax, hu hāmyūmmūg. Yā Topap-xehnāg mūn max xe'ēgnāg. Ha tikmū'ūn 'ūm te hitop tu yīkopit, hu: “Teptu Topa te' yānān tuk kummugāhā', 'āte koit hah?” Kaxīy. ⁸ Tikmū'ūn nōy te hitop tu hām'āktux, hu: Yā' max yūmū'āte hāpkummuk mīy, puyīy Topa hāmmaxnā', yā' yānān tu hāmmaxnā',” kaxīy. Ha tikmū'ūn nōy tek mūn kummuk 'āktux, hu: “Paot te nōm 'āktux.” Kaxīy. Tu' koit. Topa te hām'āktux kummuk xop hāpkummugāp-tup 'ūyānān tu'.

Ūxohix te hāpxopmā kummuk

⁹ 'Ok Topa tek mū yōg Yoneo xop pe'paxex max, xi' puknōg xop pe'paxex kummuk? 'Āmhok! Yā' xohix te yāy putuk Topa pu', 'ūxohix te hāpxopmā kummuk putup pax, ha' kuxa hīy ka'ok, ¹⁰ yīy Topa yōg tappet te:

“Tikmū'ūn yok 'ūm 'ap xip'ah.

¹¹ tu yā hāmyūmmūg 'ohnāg, xix Topa xak 'ohnāg.

¹² Ūxohix te Topa nīm, tu Topa yōg putat xak.

Ū'ūm te hāpxopmā max? 'Ap xip'ah, 'ap puxehnāg xip'ah.

¹³ Ūyīy'ax te xukpot hax xūy, yā' kummuk, tu yā mō'āmā pax,

'Ûyĩkox te kãyãnox yĩkox putuk, nõy tu yĩ'ax hãp-tex.

14 Tu' mǎnõg, hu: 'Pũyã Topa 'ãxat hã 'ãp-tex!' kaxĩy.

15 Yã' xak, nõy tikmũ'ũn xũygã', nõy putex,

16 tu hãpkut'ex kummuk pax nã' xip, tu hãpkoxyoõy pax,

17 tu' nõy kuxa yũmmã 'ohnãg,

18 tu Topa yĩpkutuk 'ohnãg, nõy tu nõktettex,

yã' kuxa te' yẽy 'okpa Topa xip." Kaxĩy.

19 Yũmũ'ãte hãmyũmmũg, tu Topa te' xat'ax hõm yũmmũg, ha Yoneo yõg tikmũ'ũn pu' hõm, tu' hõm puyĩ' xohix yãy yõg hãpxopmã'ax yũmmũg, nõy yãyhãhup Topa tu', ha Topa te tikmũ'ũn xohix, xi' hep xop xohix yõg hãpxopmã'ax kopit putup, nõy yõg hãpxopmã kummuk yũmmũg, nõy yãnãn tu' kummugã'. 20 Paxpu tikmũ'ũn Topa xat'ax pu' yĩpkox pi', puxi' kuxa tupmã hok. 'Ãmhok. 'Ûxat'ax te tikmũ'ũn pu hãmyũmmũgãhã', pãyã' kuxa kummuk tupmã 'ohnãg.

Tikmũ'ũn kuxa yũm ka'ok Yeyox kopah, puxix Topa' kuxa kummuk tupmã'

21 Pa Topa te tikmũ'ũn kuxa kummuk tupmã nõmhã', tu' xat'ax hok hã' tupmãhã', ha Mõyyex yõg xat'ax te yũmũ'ã hãmyũmmũgãhã', xix tik hittap xop te Topa pupi hãm'ãktux, tu yũmũ'ã hãmyũmmũgãhã kamah, yĩy Topa yõg tappet te: Ya hamũn! Kaxĩy. 22 Topa te' kuxa kummuk tupmãhã', pu tu kuxa max. 'Ûkuxa yũm ka'ok Yeyox Kunnix kopah, yĩy Topa te' tupmãhã'. Yã' hep xohix te yãy putuk, yã Yoneo yõg tikmũ'ũn, xix nõm xop te Yoneo xop hã' puknõg, yã yãy putuk. Ha Topa te' kuxa mãm ka'ok xop xohix tupmãhã',

pu tu kuxa max. ²³ 'Ūhep xop xohix te Topa yōg putat xak, tu' nīm, tu hāpxopmā kummuk pax, hu Topa putuk 'ohnāg. ²⁴ Pa Topa te hāmaxnāhā', tu nōm kuxa kummuk tupmāhā', 'ūhok hā' tupmāhā', yā Yeyox Kunnix xok hā' tupmāhā', pu tu kuxa max. Yeyox Kunnix xok, nūy tikmū'ūn kuxa kummuk xit, nūy kuxa max tat 'ūyānān tu'. ²⁵ Topa te tu' mūg Kunnix tu: "Ūpēnā," kaxīy, tu nōm yāykutnāhā', pu mīpkupnix tu tu' xok, puyīy Topa tikmū'ūn yōg hāpkummugā'ax xaxogā', pu tu kux, Yeyox Kunnix xok'ax hā' Topa te' xaxogāhā', tu hāmyok mīy xe'ēgnāg tu' xaxogāhā', tikmū'ūn kuxa mām ka'ok hā' xaxogāhā'. Hōmā Topa te nōā'tot tikmū'ūn yōg hāpxopmā'ax kummuk, tu 'ap koit'ah, ²⁶ pa hōnhā Kunnix mūg, ha' xok tikmū'ūn pupi', pu tikmū'ūn xohi' yūmmūg, nūy: "Yā Topa te hāmyok mīy, hamūn, Topa max xe'ēgnāg," kaxīy. Ha hāmyūmmūgāhā', puyīy yūmmūg. Yā Topa te tikmū'ūn kuxa kummuk tupmāhā', tu' kuxa mām ka'ok xop tupmāhā', nōm xop kuxa mām ka'ok Yeyox kopah.

²⁷ Putep te xīy yā yāy pe'āpaxex? Putep te xīy 'āyōgkānāmnām hā 'āxip? 'Ok yūmū'āte hāmyok mīy, pu Topa yūmūg putup? 'Ok yūmūg yīpkox pip' Topa yōg xat'ax pu', nūy yūmūg kuxa tupmā'? 'Āmhok. 'Ap kaxīy'ah. Pāyā yūmūg kuxa mām ka'ok Yeyox kopah, hu Topa te yūmūg kuxa tupmāhā', pu tu kuxa max. ²⁸ Hu' yūmmūg, Topa te' kuxa yūm'ax puxehnāg hā tikmū'ūn kuxa tupmāhā', tu' xat'ax hā' tupmā 'ohnāg, tu' yīpkox pip'ax hā' tupmā 'ohnāg. ²⁹ 'Ok Topa te Yoneo xop puxet hā yā Topah? 'Ok pe Topa te' puknōg xop hā yā kamah?

Hamũn! Yã' hep xohix xop hã Topah. ³⁰ Topap-xet, tu Yoneo yõg tikmũ'ũn kuxa tupmãhã', 'ũkuxa mãm ka'ok hã' tupmãhã', tu' puknõg xop kuxa mãm xop kuxa tupmãhã'. ³¹ 'Ok Topa te' xat'ax nõã', puyĩy tikmũ'ũn kuxa mãm ka'ok Yeyox kopah? 'Ãmhok. Topa te' nõã' 'ohnãg, hak mũ'ãte' xat, puyĩ' yĩpkox pi', nũy mãynãg mĩy.

4

Paot te mõnãyxop 'Amanãm 'ãktux

¹ 'Ãpu yũmũ'ãte 'Amanãm 'ãktux, nõm te Yoneo yõg tikmũ'ũn xohix hã mõnãyxop hãmãxap. Putep 'ãktux'ax yũmũ'ãte'? ² Yã Topa te 'Amanãm max 'ãktux. Teptu Topa te' xuktux? 'Ok hãpxopmã'ax hã' xuktux? 'Ãmhok. Yã' hok tu Topa te mõ'yãy xe'ëgnãg, yĩy 'Amanãm te yãy mũn kutõgnãg pe'paxex. ³ Yã Topa yõg tappet te: "Amanãm kuxa yũm ka'ok Topa kopah, yĩy Topa te' kuxa kummuk tupmãhã', pu tu kuxa max." Kaxĩy. ⁴ Tikmũ'ũn hãm, hu tayũmak paha', 'ũhok hã' pa 'ohnãg, pãyã hãm'ax tu' paha'. ⁵ Ha tikmũ'ũn kuxa kummuk, 'ap hãpxopmã max yũmmũg'ah, pa' kuxa yũm ka'ok Topa kopah, puxix Topa pãnã', nũy kuxa yũm'ax pãnã', tu' hok hã' kuxa kummuk tupmãhã'. 'Ok Topa te tikmũ'ũn kuxa kummuk xohix tupmãhã'? 'Ãmhok. Pa nõm xop te hãpxopmã max hok, tu' kuxa mãm ka'ok, yã Topa te nõm kuxa tupmãhã'. ⁶ Hõmã mõnãyxop hittap Namix te hãm'ãktux, tu tikmũ'ũn hittup'ax 'ãktux, Topa te' yõg hãpkummuk mĩy'ax xaxogãhã', yã hãpxopmã'ax hok hã' tupmãhã', ha' hittup tikmũ'ũn, yĩy Namix te:

7 “Tikmũ'ũn kuxa hittup, Topa te 'üyõg hãpkummuk
mỹ'ax

xaxogãhã hah, pu tu kux.

8 Tikmũ'ũn kuxa hittup, Topa te' yõg hãpkummuk
mỹ'ax

mõ'kupix 'ohnãg, ha' hittup,” kaxĩ.

9 Pi'yã' tikmũ'ũn hittup? 'Ok Yoneo yõg tikmũ'ũn
puxet hittup? 'Ok pe' puknõg xop hittup kamah?
Namix te putep 'ãktux? Yã Namix te' hep xop xohix
'ãktux, nõm kuxa mãm ka'ok xop 'ãktux, yĩy Topa
yõg tappet te xe: “Amanãm kuxa yũm ka'ok Topa
kopah, yĩy Topa te' kuxa tupmãhã', pu tu kuxa
max,” kaxĩ. 10 Hãm 'ũm hã Topa te' tupmãhã'?
Pi'yã'? 'Ok pe 'Amanãm te yã yã nãg xex xak 'üyĩmap
tu hãmãxap, hak-nãy tu' tupmãhã'? 'Ok pe Topa
te 'Amanãm kuxa tupmã hãmãxap, hak-nãy tu yã y
xax xak 'üyĩmap tu'? Yã Topa te' tupmã hãmãxap,
11 hak-nãy tu 'Amanãm te yã y xax yĩmap tu' xak,
puyĩy tu yã y kuxa yũm'ax yũmmũgã', yã' kuxa yũm
'ax ha Topa te 'Amanãm putup, tu' kuxa tupmã
hãmãxap, pu tu max, yĩy 'Amanãm te yũmũ' hã
mõnãyxop, ha yũmũg kuxa mãm ka'ok hã yũmũg
kuxa tupmãhã yã y pu', pa yũmũg yãg te yã y xax
'üyĩmap tu' mep hok. 12 Ha 'Amanãm te Yoneo yõg
tikmũ'ũn hã mõnãyxop yã kamah, nõm xop kuxa
mãm ka'ok Topa kopah, tu 'Amanãm putuk, Topa
yõg putat hã' mõg 'Amanãm putuk tu', ha kaxĩy
'Amanãm kuxa yũm ka'ok hãmãxap, tuk-nãy tu yã y
nãg xex yĩmãp tu' xak.

Topa te hãm'ãktux xex

13 Topa te 'Amanãm pu hãm'ãktux xex, xix
'Amanãm mõkputox pu hãm'ãktux xex kamah, nõy

tu hām xexka hōm'ax 'ōm pu', xi' mōkputox pu', puyīy yāy yōg nū hām xexkah, ha hām'āktux xex, 'Amanām kuxa yūm ka'ok hah. Teptu hām'āktux xex 'Amanām pu'? 'Ok xex 'ūxat'ax mīy hah? 'Āmhok. Topa mūn te hām'āktux xex hāmāxap, 'Amanām kuxa yūm ka'ok hah, hak-nāy tu 'Amanām te' xat'ax pu' yīpkox xip. ¹⁴ Yoneo yōg tikmū'ūn yīpkox pip Mōyyex yōg xat'ax pu'. Paxpu Topa te hām'āktux xex 'ūyīpkox pip xop pu', puxik-tōgnāg, pu' kuxa mām ka'ok, puxix Topa hām'āktux hitop tu' xex. ¹⁵ 'Ūxat'ax te Topa te hāmyok mīy 'āktux. Tikmū'ūn yīpkox 'ohnāg Topa yōg xat'ax pu', nūy tu hāpxopmā kummuk, puxix yāy tu Topa gāyāhā', ha Topa te' kummugāp-tup 'ūyānān tu'. Paxpu' xat'ax tu xip hok, puxix tikmū'ūn hāmyūmmūg 'ohnāg, nūy xat'ax pu' yīpkox pi', puxix Topa tu gāy hok kamah.

¹⁶ 'Ūyūmmūg. 'Amanām kuxa yūm ka'ok Topa kopah, yīy Topa te hām'āktux xex xe'e', tu' hok hōm'ax 'Amanām mōkputox pu', nōm xop kuxa mām ka'ok xop pu' hok hōm, nōm te Topa yōg putat hā' mōg, 'Amanām putuk, ha yūmū'ā hā 'ātak, yā yūmūg kuxa kama mām ka'ok.

¹⁷ Ha Topa yōg tappet te: “Ūhēp xop xohix te 'Amanām 'āktux putup, hu: ‘Amanām yā yūmū'ā hā mōnāyxop, yā yūmūg kuxa mām ka'ok kamah, 'Amanām putuk,’” kaxīy. Yīy Topa te hām'āktux xex ka'ok, ha 'Amanām kuxa yūm ka'ok Topa kopah, yā Topa xexkah, tu tikmū'ūn xakix'ax hīnnāhā', tu hām xexka xohix yōg hāpxop mīy, tu hāpxop hok hā' mīy, 'ūxat'ax hā' mīy. ¹⁸ 'Amanām kutut, xi' xetut kutut, 'ūka'ok, tuk-tok 'okpa Topa te ta tu hām'āktux

xex, hu: “Ämõkputox xohix xexka pip punethok,” kaxīy. Yīy 'Amanām kuxa yūm ka'ok, tu hāmmax hip, pa' kutut xe'e 'Amanām, ¹⁹ üyõg hāmyāxatamuk xohix te 100, ha' yīn pu'uk, pa' kuxa yūm ka'ok, tu' yīkopit 'ohnāg, 'ihā' xetut ka'ok yūmmūg, ²⁰ tu' hittup, tu' kuxa yūm ka'ok, Topa te hām'āktux xex tu', tu nōm pu: “Ämax. Xate 'ā' hōm putup 'ūgkutok pit. Ya hāmūn. Puxi',” kaxīy. ²¹ Tu hāmyūmmūg, hu: “Topa te 'ā' hōm putup 'ūgkutok pit, tu' ka'ok xe'ēgnāg, nūy tu 'ā' hōm,” kaxīy. ²² Hu' kuxa yūm ka'ok Topa kopah, ha Topa te' kuxa tupmāhā', pu tu kuxa max. ²³⁻²⁴ Topa yõg tappet te 'Amanām 'āktux, tu yūmū'ā 'āktux kamah, yā Topa te' kuxa mām ka'ok xop xohix kuxa tupmāhā', 'ū tu kuxa max, ha yūmūg kuxa mām ka'ok Topa kopah, nōm te yūmūg xuxyā hīnnāhā' putpu', yā Yeyox Kunnix mūn hīnnāhā', ²⁵ ha te Topa tux hok, pu tikmū'ūn putex, ha yūmūg pupi' xok, nūy yūmūg yõg hāpxopmā'ax kummuk tu' xok hā' pago, ha Topa te putpu' hīnnāhā', nūy yūmūg kuxa kummuk tupmā Topa tu'.

5

Topa te yūmūg kuxa kummuk tupmāhā'

¹ Topa te yūmūg kuxa kummuk tupmāhā', yūmūg kuxa mām ka'ok hah. Yā Topa gāy kux, ha yūmūg kuxa mām, nūy tu hittup. Yūmūg xuxyā Yeyox Kunnix te yūmūg kuxa māmāhā', ² tu yūmūg mōgāhā', 'ūmōg Topa yõg putat hā. Yā yūmūg kuxa mām ka'ok Kunnix kopah, yīy Topa te yūmū'ā hāmmaxnāhā', ha Topa yõg putat hā yūmūg mōg kumak mōg. Yā yūmūg kuxa hittup, 'ihā' mām

ka'ok, tu hāmmax hip, nūy yāyhā tu max xe'ēgnāg, Topa putuk. ³ Yūmū'āte' hip kamah, 'ihā yūmūg xūy, pāyāk kuxa hittup, 'ihāk xūy kamah. Yā kaxīy yūmūg xūy hā' tot. ⁴ Yūmū'āte nōā' tot, ha Topa te' pēnāhā', tu yūmūg putup, yīy yūmū'āte hāmmax hip, nūy yāyhā Topa putuk. ⁵ Yūmūg kuxa teknōg 'ohnāg, yā Topa te hām'āktux, tute mō yūmūg yāy xe'ēgnāg 'āktux, ha Topa Koxuk te yūmūg kuxa yūmmūgāhā', tu Topa te mō yūmūg yāy xe'ēgnāg yūmmūgāhā', ha Topa te yāy Koxuk nū'kutnāhā yūmū'ā', yīy hāmmax hip.

⁶ Hōmā yūmū'āte Topa hāk puknōg, tu hāpxopmā max hok, ha Kunnix xok, yūmūg pupi' xok, yūmūg kuxa kummuk, yī' xok, ha Topa te 'āmnīy puxet yāykutnāhā', ha Kunnix xok nō'ōm 'āmnīy 'ihā', nūy yūmūg kuxa ka'ogā', 'ūyīy yūmūg hāpxopmā max. ⁷ Tikmū'ūn 'ūm te' nōy pupi' xok'ax? 'Ok tik te hāmyok mīy pupi' xok'ax? Yā' ka'ok, nūy nōy yānān tu' xok, pa tikmū'ūn kutōgnāg te tik max 'ūyānān tu' xok'ax. ⁸ Pa Topa te mō yūmūg yāy xe'ēgnāg, tu yūmūg yūmmūgāhā', yā Kunnix te yūmūg pupi' xok tap, 'ihā yūmūg kummuk nām! ⁹ Ha' xok, nūy yūmūg kuxa kummuk tupmā', pu tu kuxa max, puyīy Topa gāy kuxyā yūmūg pupi'. ¹⁰ Hōmā Topa te yūmū'ā tu' gāy, pa Topak-tok xok, nūy yūmūg kuxa kummuk xit, nūy kuxa max tat 'ūyānān tu', ha hōnhā Topa te yūmū'ā hāk xape', ha Kunnix hi putpu', tu yūmūg kopa' xip. ¹¹ Yūmūg kuxa hittup xe'e', yā Topa yūmū'ā hāk xape, xix Yeyox Kunnix te yūmūg kuxa hittupmāhā', yā yūmūg xuxyā', tu Topa gāy kuxyāhā', yīy Topa hā yūmūg xape'.

Anão xix Kunnix

12 Tik te mǎxap puxet te hǎpxopmǎ kummuk hǎm xexka tu', hu' xok, hǎpxopmǎ kummuk tu' xok, yī' hep xop xohix xakix'ax, 'ūxohix te hǎpxopmǎ kummuk tu'. 13 Hõmǎ, hǎmyāxatamuk xohixnǎg hǎ, 'ap xip'ah Topa yõg xat'ax, ha' hep xop xohix te hǎpxopmǎ kummuk, pǎyǎ Topa te hǎpxopmǎ'ax kummuk mō'kupix 'ohnǎg, yǎ tikmũ'ũn te' yõg xat'ax yũmmũg hok. 14 Mõnǎyxop hǎmǎxap 'Anǎo 'a' yīpkox pip'ah 'ūxat'ax pu', tu hǎpkummuk mīy, ha' hep xop xohix te hǎpxopmǎ kummuk, hu' xakix nǎm, 'īhǎ 'Anǎo xip hǎpxexka tu', ha' xohix xakix, tu mōktu mõnǎyxop hittap Mõyyex xip, nõm te Topa yõg xat'ax kax'ǎmi', yǎ' xohix xakix.

'Anǎo yǎ tikmũ'ũn kummuk hǎ mõnǎyxop hǎmǎxap, ha Yeyox Kunnix 'ūk-nǎy tu' nũn, nũy yǎyhǎ tikmũ'ũn kuxa tup xop hǎ mõnǎyxop. 15 'Ūyũmmũg. Topa te hǎmmax nǎhǎ', pǎyǎp-xet'ah. Topa te hǎmhok hǎ' hǎmmaxnǎhǎ', pa 'Anǎo te hǎpkummugǎhǎ'. Ya hamũn. 'Ūhep xop xohix xakix, 'Anǎo te hǎpkummuk mīy, ha' xakix, pa Topa mũn max xe'ēgnǎg, tu hǎmmaxnǎhǎ hǎmhok hǎ', tu tikmũ'ũn kuxa kummuk xit, Yeyox xok hǎ' xit, nũy kuxa max 'ūyǎnǎn tu' tat, Yeyox Kunnix te tikmũ'ũn mō'yǎy xe'ēgnǎg hah. 16 'Ūyũmmũg. Tik puxet te hǎpkummuk mīy, ha Topa gǎy, tu: "Yǎ' kummuk 'õhõm!" kaxīy. Pa Topa te hǎpkummuk mīy'ax xop pu hǎmmaxnǎhǎ', 'ūhok hǎ hǎmmax nǎhǎ', tu hǎpkummuk mīy'ax xexka xaxogǎhǎ', tu' kuxa kummuk xit, 'ūhok hǎ' xit, nũy kuxa max tat tu' yǎnǎn. 17 Hamũn. Tik puxet te hǎpkummuk mīy, yī' hep xop xohix xakix'ax. Yǎ hǎpxopmǎ xexkah, tu' xohix pu hǎpkummugǎhǎ'.

Pa tik nōy te hāpxopmā xexka xe'ēgnāg, 'ūxuxet'ax Yeyox Kunnix, tu hāmmax xexka nāhā' 'ūxohix pu', nōm xop kuxa mām ka'ok Yeyox kopa' xop pu hāmmaxnāhā', ha Topa te' kuxa kummuk tupmāhā', pu tu kuxa max, ha Kunnix te yūmū'ā xexkānāp-tup, 'ūyīy nū mūtik yūmūg hi xe'ēgnāg, nūy hi mōkumak mōg.

¹⁸ Tik puxet te hāpkummuk mīy, yī' hep xop xohix xakix'ax, ha hāpxopmā'ax max puxet nōy te' xohix kuxa tupmāhā', tu' hīnnāhā'. ¹⁹ Tik puxet te' hep xop xohix pu hāpkummugāhā', tu Topa pu' yīpkox xip 'ohnāg, hu yāy putox xop xohix pu hāpkummugāhā', yā' hep xop xohix te hāpkummuk mīy kamah. Pāyā tik puxet nōy te' xohix pu hāmmaxnāhā', tu' yīpkox xip Topa pu', hu hāmmaxnāhā', tu' kuxa kummuk tupmāhā'.

²⁰ Topa te' xat'ax hōm, nūy hāpkummuk yūmmūgā', ha hāpxopmā'ax kummuk te' nōy nā' mōg tu mōktu yā' xohix, pa Topa te hāpxopmā hok hā hāmmaxnāhā', tu nōy nā' mōg tu mōktu xohix xexkah. ²¹ Hōmā tikmū'ūn te hāpxopmā kummuk, ha' kuxa hīy ka'ok, pa hōnhā Topa te hāmmaxnāhā', tu' hok hā tikmū'ūn kuxa kummuk tupmāhā', pu tu max, puyīy hāmyok mīy, nūy tu hi xe'ēgnāg mō kuma' yūmūg xuxyā mūtik, nūy Yeyox Kunnix mūtik hāpxopmā'ax xohix xat.

6

Kunnix tek mūg kuxa tupmāhā'

¹ Yūmū'ātep-tep 'āktux'ax? 'Ok max, yūmūg hāpxopmā kummuk pax, puyīy Topa hāmmaxnā xexka'? ² 'Āmhok! Kaxīy hok! Yā yūmūg kuxa

mām ka'ok Yeyox kopah, ha Topa te yūmūg kuxa kummuk tupmāhā', pu tu kuxa tup, nūy hāpxopmā kummuk putup hok, nūy kuxyā'. Tikmū'ūn xok, tu hāpxopmā kux, ha kaxīy yūmū'āte hāpxopmā kummuk tu kux kamah, ³Yūmūg kuxap-xet Yeyox Kunnix kuxa mūtik nūy. Yā yūmūg pupi' xok, 'ūyīy yūmūg hāpxopmā kummuk tu kux, ha tikmū'ūn te yūmūg putox pix, puyī' xohix hāmyūmmūg. Yā Kunnix xok yūmūg pupi', pu yūmūg kuxap-xet yāy kuxa mūtik. ⁴Yeyox Kunnix xok, ha nō hāpkot yūmūg pupi kamah, pu yūmū yōg hāpxopmā'ax kummuk xaxogā'. Ha yūmūg putox pix, nūy yūmū'ā hāmyūmmūgā', 'ūyīy hāpkummuk mīy kux. Ha Topa yūmūg Tak te Kunnix putpu hīnnāhā', tu yūmūg ka'ogāhā kamah, 'ūyīy yūmūg hi xe'e Yeyox mūtik, nūy tu hāpxopmā max.

⁵ Yā Kunnix xok, yūmūg pupi' xok, 'ūyīy yūmū'ā hāpxopmā kummuk tu kux, ha' putpu' hi yūmūg pupi kamah, 'ūyīy yūmūg hi xe'e'. ⁶ Tu hāmyūmmūg. Hōmā yūmū'āte hāpxopmā kummuk, tu' mīy pax, pa Kunnix te mīpkupnix yīmū tu' xok, yūmūg pupi' xok, nūy yūmūg kuxa tupmā', pu hāpkummuk yūmūg kuxa hīy hok, pu yūmū'ā hāpxopmā kummuk tu kux, nūy yānān tu hāpxopmā max. ⁷ Tikmū'ūn xok, tu hāpkummuk mīy kux. ⁸ Kunnix xok yūmūg pupi', 'ūyīy hāpkummuk mīy tu kux, tu' putpu' hi yūmūg pupi kamah, 'ūyīy hi mō'kumak mōg yāy mūtik. ⁹ 'Ūyūmmūg. Topa te Kunnix hīnnāhā' putpu', yīy xe xok putup 'ohnāg. Yā Topa te' hīnnāhā', pu tu hi mō'kuma' mōg. ¹⁰ Yā' xok, ha hāpkummuk mī'ax xop te xe Kunnix putex 'ohnāg, 'ap xep xok putup'ah, pa

Topa tu' hi xe'ëgnäg. ¹¹ Yã Kunnix xok 'ãxop pupi', nũy 'õg kummuk mĩy'ax kuxyã'. 'Õxaxok hok! Hõnhã Kunnix hi xe'e Topa tu', ha 'ãkuxap-xet Yeyox Kunnix kuxa mütik, nũy Topa tu 'ãhi xe'e kamah.

¹² Hãpkummuk mĩy hok, xix yãy putup'ax mĩy hok, xayĩy yãy kummugã hok. ¹³ Topap-xehnäg pu 'ĩpkox pi', pu tu 'ãxat. Yã xa hãmaxnã xexka! Tu 'ãhĩnnãhã', ha Topa tu 'ãhi', nũy hãmyok mĩy, yĩy 'ãnõy pu 'ãyĩpkox hok, xayĩy hãpkummuk mĩy hok.

¹⁴ Tikmũ'ün kummuk pu 'ãyĩpkox hok. Yã yũmũg xat hok. Pa Topa te yũmũg hĩnnãhã', 'ap xat'ax te yũmũg hĩnnã'ah, pa Topa te yũmũ'ã hãmaxnãhã', tu' hok hã' nãhã', ha yũmũg hi xe'ëgnäg.

Yũmũ'ã Topa hã kãmãnat xop

¹⁵ Mõyyex yõg xat'ax tap, ha Topap-xehnäg te nõmhã yũmũg xat, tu yũmũ'ã hãmaxnãhã'. 'Ãxop te-putep pe'ãpaxex? 'Ok Topa te yũmũg kuxa tupmãhã', 'ũyĩy yũmũg hãpkummuk mĩy? 'Ap hamũn'ah! Yãmhok! ¹⁶ 'Ãxop te hãmyũmmũg. Tik te' nõy pu' hãm, puxix yã' nõy yõg kãmãnat, tu' yĩpkox pip, tu hãm'ãpak, nũy tu hãm max. Ha kaxĩy tikmũ'ün te Topa pu' yĩpkox pip, tu Topa hã 'ũyõg kãmãnat, ha nõm pu hãmaxnãhã', tu' kuxa kummuk tupmãhã', pu tu kuxa max. Pãyã tikmũ'ün yĩpkox hok, puxix tu hãpxopmã kummuk, tu yãy kuxa tupmã hok. Yĩy Topa te nõm putup nõg, 'ũkuxa kummuk hah. Yã yãy kummugãhã'.

¹⁷ Nũ mõy Topa pu hãm'ãktux, nũy: "Ãmax Topah!" kaxĩy. Yã hõmã 'ãxop te hãpxopmã kummuk, pãyã hõnhã Topa pu 'ãyĩpkox pip, hãm'ãpak max 'ãpak'ax tu', ha tikmũ'ün te xa hãmyũmmũgãhã',

tu xa hāpxe'e yūmmūgāhā', yīy 'ākuxa tep-tup, tu' hittup xexka'. ¹⁸ Hōmā 'ākuxa hittup 'ohnāg, hāpxopmā kummuk tu', pāyā nōmhā Topa yōg putat hā 'āmōg, nūy hāpxopmā max, nūy Topa yōg putup'ax māynāg mīy, hu 'ākuxa hittup xexka'. ¹⁹ 'A 'āxop te hāmyūmmūg'ah, yīy 'āte hām'āktux'ax hā xa hāmyūmmūgāp-tup. Hōmā 'āxop te' xak, nūy hāpkummuk mīy, tu' mīy pax, tu 'ānōy hā'xupxet, tu 'ānōy kummugā pax, Hu mōy, hōnhā xax, nūy Topap-xehnāg pu hāpxopmā max, xayīy 'āhi xe'e', xayīy 'ānōy pu hāmmaxnā'.

²⁰ Hōmā 'āxop te hāpxopmā kummuk pax, tu Topa pu 'āyīpkox 'ohnāg. ²¹ Nāy 'ūxutigā', nūy 'ōg hāpxopmā'ax kummuk pe'āpaxeh. 'Ok 'āhittup, 'ihā hāmpē'āpaxex? 'Ok pe xate yāyhāhup? Yā xate yāyhāhup, hāpxopmā kummuk tu'. Hōmā 'ākuxa hittup 'ohnāg, yā Hāmgāyāgnāg Pet ha 'āmōg'ax. ²² Pa Topa te 'ākuxa ka', tu 'ākuxa kummuk tupmāhā', xa kuxa max, nūy Topap-xehnāg pu 'āxop hāpxopmā max, nūy 'āhi xe'ēgnāg mō kuma 'āmōg. ²³ Tikmū'ūn te hāpxop kummuk hā yāy kummugāhā 'ūyānān tu', nūy pago, hu ta xakix. Pa Topa te hāmmaxnāhā', 'ūhok hā hāmmaxnāhā', nūy tikmū'ūn hīnnā xe'ēgnāg. Yeyox Kunnix xok hā' hīnnāhā', nō'ōm yūmūg xuxyā xe'e', ha yūmūg kuxap-xet Kunnix kuxa mūtik.

7

Paot te yāyta'ax xop hā hāmyūmmūgāhā'

¹ 'Ūkxape xop, 'āxop xohix te' xat'ax yūmmūg, hu hām'āktux yūmmūg kamah yōgnū'. 'Ūxat'ax yā' xat tikmū'ūn xohix, ha ta' xakix xop 'ap xat'ah.

2 'Ūyūmmūg. 'Ūn yāytaha', ha' xat'ax te 'ūgmīy ka'ok, tu' yīpxox mūggā ka'ok, pa' yīpxox xok, puxix 'ūhīy'ax koa', ha ta' nīm, tu' hok yūm. 3 Kaxīy, 'ūn te tik nōy mūtik nōm 'īhā' yīpxox xip, puxix tikmū'ūn te: "Yā 'ūn kummuk, tu' nōy hā' xupxet," kaxīy. Pa 'ūn yīpxox xok, puxix tup-xehnāg, nūy hok yūm, tu nōm pu' yīpkox xip kux, yā' max, 'ūn te tik nōy mūy, nūy nū mūtik yāyax. 4 'Ūkxape xop, yā kaxīy 'āxop te 'āhok pip xop putuk. Yā Kunnix xok 'īhā Mōyyex yōg xat'ax pu 'āyīpkox kux, nūy hōnhā Kunnixp-xet pu 'āyīpkox pi'. Yā 'āxop te Kunnix hā' yīn xexka', tu yā hōnhā 'ūyōg, ha putpu' hi', 'ūyīy yūmūg hāpxopmā max Topa pu'. 5 Hōmā yūmū'āte hāpxopmāhā', tu yā yāy yōg putup'ax xohix mīy, tikmū'ūn xop xohix putuk, yūmū'āte' mīy, ha' xat'ax te hāpkummuk mīy xat hok, 'ūmīy hok, hu hāpkummuk mīy putup xūy, tu mōktu yūmūg xakix. 6 Pa hōnhā yūmūg hok pip, ha yūmūg hīy'ax koa', yūmūg hok pip, nūy Topap-xehnāg pu hāpxopmā max. Topa Koxuk te yūmūg hīnnāhā xe'e', tu yūmūg putox kummuk tupmāhā, ha' xat'ax hittap te yūmūg xat kux. 7 Yūmū'āteptep 'āktux'ax? 'Ok xat'ax kummuk? 'Āmhok' Yā' max, pāyā' xat'ax tek mūn pu hāmyūmmūgāhā', 'ū yūmmūg, 'ok pe' max, 'ok pe' kummuk. 'Ūxat'ax tek xat hok, 'ūyīy hāpxop putup xūy hok. Paxpuk xat hok, kopxix hāpxop putup xūy hok, pa hōnhā 'āte hāmyūmmūg, hu hāpxop putup xūy xe'e'. 8 Yī' xat'ax tek xat, 'ūyīy tuk nōy yōg hāpxop putup xūy hok, hu 'āte hāpxop putup xūy. Pax puk xat hok, kopxix Topa yōg hāmp'e'paxex yūmmūg hok, xix yāy yōg hāpxopmā'ax kummuk yūmmūg

hok. Yā Topa pa te hāmyūmmūg xe'ēgnāg, hu' xat, 'ūyīy hāpxopmā max. ⁹ Hōmā 'āte' xat'ax yūmmūg 'ohnāg, tu hāmpēkpaex, hu: “Yā 'āte hāpxopmā max,” kaxīy. Pa Topa tek xat, 'ūyīy hāpkummuk mīy hok, ha 'āte' xupak, tu hāmyūmmūg, tu yāy kuxa kummuk yūmmūg, ¹⁰ hu yāy kuxa tu teknōg. Yā Topa te' xat'ax hōm, puyīy tikmū'ūn hīnnā', pak yūmmūgāhā', 'ū yūmū yāy yōg hāpxopmā'ax kummuk. ¹¹ 'Āte hāpkummuk mīy, hu yāy pu mō'āmā', tu yāy mūn max pek'paxex, pāyā' koit. Hu 'āte yāy kuxa putex, tu: “'Āte Topa yōg xat'ax mīy hok.” Kaxīy.

¹² Yā Topa yōg xat'ax max xe'ēgnāg, tu hāpxe'e'. ¹³ Tepte xīy? 'Ok hāpxop max tek kummugāhā'? 'Āmhok! Pāyā 'āte hāpkummuk mīy, ha Topa yōg xat'ax max, tu yōgnū hāpxopmā'ax kopit, nūy 'ūgmūn yūmmūgā', yā 'āte hāpkummuk mīy xe'e'.

Tikmū'ūn kuxa te yāy tuk-mīy

¹⁴ Yūmū'āte hāmyūmmūg. 'Ūxat'ax yā Topa yōg, hak mūn pu'uk, hu hāpxopmā kummuk pax, tu hāpxopmā kummuk mō kumak mōg. ¹⁵ 'Īntu'. 'Āte hāpxopmā maxp-tup, pāyā 'ap mīy'ah, tu hāpxopmā kummuk putup nōg, pāyā 'ūmīy. ¹⁶ Tu hāpxopmā kummuk, 'īhā nōm putup nōg, kopxix: Yā hamūn. Topa yōg xat'ax max xe'e'. Kaxīy. ¹⁷ 'Ak mūn te' mīy'ah, pāyā hāpkummuk tek kuxa kopa' xip mūn te' mīy. ¹⁸ 'Āte' xak, nūy hāpxopmā max, pāyā 'a' mīy yūmmūg'ah 'āte', 'ūgkuxa kummuk tu'. ¹⁹ Tu' xak, nūy hāpxopmā max, pāyā 'a' mīy'ah, tu' yānān tu hāpxopmā kummuk. ²⁰ 'A 'āte hāpkummuk mīy putup'ah, pāyā' mīy, yīy hāpkummuk tek kuxa kopa'

xip tek kummugāhā', ²¹ yīy 'āte hāmyūmmūg. 'Āte hāp̄xopmā max putup, 'ihā hāp̄xopmā kummuk 'ūp-xehnāg. ²² 'Ūgkuxa te Topa yōg xat'ax hā' hittup, ²³ pāyā 'āte hāpkummuk mīy pax, 'ūgkuxa kummuk tu'. Tu hāp̄xopmā max xak, pāyāg kuxa kummuk tuk hīy, 'ū hāp̄xopmā max hok. ²⁴ Huk hittup 'ohnāg. 'Ū 'ūm mūn tek ka'ogā'ax, 'āte hāp̄xopmā max? ²⁵ Topa tek ka'ogāp-tup, yīy 'āte: "Topa 'āmax," kaxīy. Yā Yeyox Kunnix te 'ū 'ūm hā 'ātehet.

Kaxīy 'ūgkuxa kopa 'āte' xak, nūy Topa yōg xat'ax 'ūgyīpkox xihip, nūy 'ūgmāynāg mīy, pāyā 'āte' mīy yūmmūg'ah, hu hāpkummuk mīy pax.

8

Topa Koxuk tek mūg ka'ogāhā'

¹ Topa te yūmūg kummuk 'ūm 'āktux'ah nōmhā, yā yūmūg kuxap-xet Yeyox Kunnix kuxa mūtik, ha Topa te yūmūg 'ūm 'āktux kummuk 'ohnāg Yeyox Kunnix hah. ² Topa Koxuk te yūmūg hīnnā xe'e Yeyox Kunnix mūtik, tu yūmūg mōy, pu' xat'ax yūmūg kuxa hīy hok, 'ūyīy yūmūg hāpkummuk mīy hok, nūy yūmūg xakix hok kamah. ³ 'Ūxat'ax te yūmūg 'ūm kuxa tupmā'ah. Yūmū'āte yāy putup'ax mīy, yīy hāp̄xopmā kummuk pax, pa Topa ka'ok, tu yūmūg kuxa tupmāhā', pu tu kuxa max, tu hāp̄xopmā'ax kummuk 'āktux kummuk kamah, huk-tok pit nū'kutnāhā', ha yāyhā tikmū'ūn kutok nūy hāpkummuk kuxyā', ⁴ 'ūyīy yūmūg hāp̄xopmā max, nūy tu' xat'ax xohix pu yūmūg yīpkox pī', yā' xat'ax max xe'e'. Ha Topa Koxuk te yūmūg ka'ogāhā', 'ūyīy yāy putup'ax mīy hok. ⁵ Tikmū'ūn te yāy putup'ax mīy, puxix tute hāpkummuk mīy,

pa tikmũ'ũn te Topa Koxuk pu' yĩpkox pip, puxix tu hãpxopmã max, Topa Koxuk pekpaxex tu'.
 6 Tikmũ'ũn te yãÿ putup'ax mĩÿ, puxix tu xakix, hãmp'e'paxex kummuk tu', pa tikmũ'ũn te Topa Koxuk pu' yĩpkox pip, nũÿ hãpxopmã max, puxix tu hi xe'e', tu' kuxa mãm max, Topa Koxuk pe'paxex tu'.
 7 Yĩÿ tikmũ'ũn gãÿ, tu Topap-tup nõg, nũÿ yãÿ putup'ax mĩÿ, tu yã hãmp'e'paxex kummuk, tu Topa yõg xat'ax pu' yĩpkox 'ohnãg, tu' mĩÿ 'ap yũmmũg'ah,
 8 yĩÿ Topa te nõm xop putup hok, nõm te yãÿ putup'ax mĩÿ pax.

9 Pa 'ãxop te yãÿ putup'ax mĩÿ 'ohnãg. 'Ãmhok. 'Ãxop te Topa Koxuk pu 'ãÿĩpkox pip. 'Ãxop te nõm pu 'ãÿĩpkox pi', puxix Topa Koxuk 'ãkopa xip. Tikmũ'ũn te Kunnix Koxuk xip hok, puxix Kunnix yõg hok. 10 Kunnix te 'ãkopa' xip, puxix Topa Koxuk 'ãhĩnnã', Topa te 'ãkuxa tupmãhã hah, pa 'ãÿĩn xok putup, xate hãpkummuk mĩÿ pax hah. 11 Topa Koxuk te Yeyox Kunnix hĩnnãhã' putpu', tu 'ãkopa' xip, yĩÿ kamah hĩnnãp-tup putpu 'ãxop yĩn, yã hõnhã' xip 'ãkopah.

12 'Ûkxape xop: Yã Topa te yũmũ'ã hãmmaxnãhã', yĩÿ yũmũ'ãte tu ta nemẽn. 'Åpu yũmũ'ã yãÿ yõg putup'ax mĩÿ hok. 13 'Ãxop te' mĩÿ, hu ta xok, pa Topa Koxuk pu 'ãÿĩpkox pip, hu ta yã hi xe'ëgnãg. 14 Tikmũ'ũn te Topa Koxuk pu' yĩpkox pip, yã 'õhõm Topak-tok xe'ëgnãg. 15 Yã Topa Koxuk te 'ãkuxa kummugã 'ohnãg, pa' hittupmãhã', nũÿ tu kuxãnõg hok. 'Ûyũmmũg. Yũmũ'ãte yãÿhã Topak-tok xop, pu yũmũg ka'ogã', 'ũÿÿÿ Topa pu hãm'ãktux, hu: "Tak, yõgnũ 'Åtak!" kaxĩÿ. 16 Ha Topa Koxuk te yũmũg koxuk pu hãm'ãktux, nũÿ

yūmū'ā Topak-tok xop 'āktux. ¹⁷ Yūmūg yā Topak-tok xop, hu pexkox yōg hāpxop max xohix pop putup, Topa te nōm xex yāy yōg tikmū'ūn pu', ha yūmū'āte' pop putup Kunnix mūtik. Yā Topa te nōm hāpxop max xex Kunnix pu', tu pexkox kopa' xex, ha yūmū'āte hāpxop mō'koxip putup Kunnix mūtik. Nōm mūtik yūmūg xūy, kopxix yūmūg yāyhā max xe'ēgnāg Kunnix putuk.

Yūmū'āte yāyhāp-tup max xe'ēgnāg

¹⁸ 'Āte hāmpē'paxex, hu: Yūmūg xūy kutōgnāg nōmhā, tuk kuxa hittup xe'ēgnāg putup hōmā, 'īhā hāptup xe'e nōy punethok mō'nāhā', 'īhā yūmūg yāyhāp-tup max xe'ēgnāg. ¹⁹ Topa te yōnnā'ī xohix mīy, ha' hip, tu' xak, pu Topa nōm tu yāy yōg kutok xop mūg. ²⁰ Hōmā hāpxopmā'ax xohix yāyhā hitop, Topa tep-tup hah, ha hāmmax hip, ²¹ puyīy Topa tux hok, pu tik-tox hok, 'ū yāyhā max xe'ēgnāg, Topak-tok xop xohix mūtik. ²² Yūmū'āte hāmyūmmūg, nōm yōnnā'ī xop tu' kokōn, tu' xūy, 'ūn tek-tok put putup, tu' xūy, tu' kokōn, ha kaxīy yōnnā'ī xohix xūy pu Topa' hittupmā'. ²³ Pāyā' hok pip'ah. 'Āmhok. Yā yūmū'āte kopa yā' kokōn kamah, ha Topa te yūmū'ā yāy Koxuk hok hōm hāmāxap, ha' hip, nūy yūmūg yāyhā Topak-tok xop, yā yūmūg tupmāhā, 'ūyīy yūmūg tup mō'kumak mōg. ²⁴ Yā yūmūg kuxa tupmāhā', yūmūg kuxa mām ka'ok ha' tupmāhā', ha yūmū'āte hāmmax hip. 'A hōnhā yūmū'āte' pēnā'ah, tuk kuxa mām ka'ok, hu hāmyūmmūg, yā yūmū'āte' pēnāp-tup. Pax pu tikmū'ūn hāmpēnā', puxi' hip 'ohnāg. ²⁵ Pa tikmū'ūn te' pēnā hok, puxix tu kuxa mām ka'ok, tu hāmmax hip, puyīy Topa 'ā' mīy.

26 Ha Topa Koxuk te mō yūmūg nīynām, yūmūg kuxa pu'uk hah. Ha yūmū'āte Topa mūtik hām'āktux yūmmūg'ah, yīy Topa Koxuk te Topa tu ta tu' xak, yūmūg pupi tu' xak, 'ūkokōn 'īhā yūmūg pupi' xak, nūy 'ūyīy hok hā hām'āktux, nūy Topa pu hām'āktux. 27 Ha Topa te tikmū'ūn kuxa kopa pēnāhā', tu yāy Koxuk pe'paxex tu' yūmmūg, ha yāy Koxuk xe'ēgnāg te Topa tu' xak, yāy yōg tikmū'ūn pupi' xak, tu Topa yōg putup'ax yūmmūg. 28 Topa te yūmū'ā hāmmaxnāhā', tu hāmmaxnāp-tup mō'kuma' mōg, tu hāpxopmā'ax xohix hā yūmū'ā hāmmaxnāhā'. Yā yūmū'āte Topap-tup pax xexka', yūmūg yīmōgatux hah, tu yūmūg xānāhā', mō yūmūg yāy xe'ēgnāg tu', ha yūmū'āte' yūmmūg, hu yūmūg kuxa mām. 29 Topa te yūmūg yīmōgatux tap, tu yāy pu yūmūg pop, 'ū yūmūg yāyhā 'āhā tuk-tok putuk, pu Kunnix yā māxap, ha yūmūg xohix yā nōm mō nū kuhmōy. 30 Ha Topa te yāy pu yūmūg pop tap, xix yūmūg xānāhā', xix yūmūg kuxa tupmāhā', pu tu kuxa max, 'ūyīy yūmūg yāyhā max xe'ēgnāg, Kunnix putuk.

Topa te mō yūmūg yāy xe'ēgnāg Yeyox Kunnix hā

31 Hamūn, yīy yūmū'ātep-tep 'āktux'ax? Topa te yūmū mūtik tihī', yīy tikmū'ūn kummuk te hitop tu yūmū'ā hāpkummugāhā'. 32 Topa te yāy kutok pit puxet kumīy 'ohnāg, pa yūmū'ā' hōm. 'Ūk-tok hōm yūmū'ā', puxix tu hāpxop xohix yūmū'ā' hok popmāp-tup kamah. 33 Topa te yāy yōg tikmū'ūn yīmōgatux. 'Ok tik 'ūm xip, nūy 'ūkummuk 'āktux? 'Ap tik 'ūm xip'ah, yā Topa mūn te' kuxa tupmāhā', pu tu kuxa max. 34 Yīy tikmū'ūn 'ūm 'a' kummuk 'āktux'ah. Kunnix xok, yā putpu' hi', tu Topa yīpxe'e

hā' xip, tu yūmūg pupi Topa tu ta tu' xak, ³⁵ tu mō yūmūg yāy xe'ēgnāg. 'Ap tikmū'ūn 'ūm xip'ah, xix hāpxopmā'ax 'ūm xip'ah, nūy Topa pu' hupmā hok, puyīy Topa yūmūg putup hok. Yūmūg xūy xix hāpxop xak'ax tat punethok, xix tikmū'ūn te yūmūg xūygāhā', ha putup te yūmūg kix, ha topixxax 'ūm yūmūg xip hok, xix tikmū'ūn kummuk te' xak, nūy yūmūg kix, puxix Kunnix mūn mō yūmūg yāy xe'ēgnāg, tu yūmūg nīm 'ohnāg. ³⁶ Topa yōg tappet te: “Āmnīy xohix hā tikmū'ūn te yūmūg putup nōg, tu yūmūg kix putup, yūmū'ā yā Topa hā tikmū'ūn hah. Tikmū'ūn te kahnēn mōgāhā', nūy putex, ha taxīy yūmūg mōgāhā', nūy yūmūg kix,” kaxīy.

³⁷ Pāyā tute yūmūg nōā hok, Yeyox Kunnix te mō yūmūg yāy xe'ēgnāg hah, yīy yūmūg kuxa hittup xexka', 'hā pexkox ha yūmūg mōg kumak mōg. ³⁸ Yīy 'āte hāmyūmmūg. Kunnix te mō yūmūg yāy xe'ēgnāg, tu yūmūg nīm 'ohnāg. Pe yūmūg hi', pe yūmūg xakix, puxix Kunnix yūmūg nīm hok. Pexkox yōg xop xix yāmīy xop te yūmūg nīmā hok, ha hōnhā Kunnix te yūmūg mūtik tihī', tu hāptup hā yūmūg mūtik hi putup, xix hāptup nōy xohix hā Kunnix te yūmūg 'ūm nīm putup'ah, mō yūmūg yāy xe'ēgnāg tu'. ³⁹ Yā pexkox yōg xop te Kunnix nīmāp-tup hok yūmū'ā', xix hām xexka xix hām kaka' pip xop te yūmū'ā nīmāp-tup hok kamah. 'Ap xip'ah hāpxopmā'ax te Topa pu hupmāhā', puyīy yūmūg nīm, ha mō yūmūg yāy xe'ēgnāg, yūmūg xuxyā Yeyox Kunnix hā Topa te mō yūmūg yāy xe'ēgnāg.

Topa xix yāy yōg tikmū'ūn

¹ 'Āte xa hāpxe'e 'āktux: 'Ūgmūn yā Kunnix yōg, hu 'ap koit'ah. Topa Koxuk tek kopa' xip, tuk kuxa pu hāmyūmmūgāhā', tu: “A xatep koit'ah,” kaxīy. ² 'Ūgkuxa hittup 'ohnāg, yāk kuxa xūy, 'īhā 'āte yāy yōg tikmū'ūn pe'paxex. Yāk xape xe'e Yoneo yōg tikmū'ūn, 'ūgmūg hep puxet tu'. ³ 'Āte hām'āktux'ax hu: Pūyā Topa 'ūgkummugā', nūy 'ūkxape hā hāmmaxnā'! Tu xe hām'āktux'ax, hu: Pūyā Kunnix 'ūgnīm, nūy tuk xape mō'nīynām 'ūyānān tu'. ⁴ Nō'ōm yā Topa yōg tikmū'ūn, ha' yīmōgatux, pu Topa hāk-tok xop, ha Topa te' xexkanāhā', yāy mūtik, tu' pa'ax mīy nōm xop mūtik, tu tu' xat'ax hōm. Yā 'ōm te Topa xak, tu' yēy Topa keppah, ha Topa te nō'ōm mūtik hām'āktux xex. ⁵ Ha mōnāyxop hittap mōkputox, ha Kunnix mūn kama mōnāyxop hā mōkputox. Pūyā' xohix Topa xexka 'āktux mō kuma' mōg, 'ūxexka xe'ēgnāg hah. Hamūn.

⁶ Pa 'a Topa te hām'āktux hitop tu' xex'ah. 'Āmhok. 'Ap kaxīy'ah, pāyā 'Iyaet yōg tikmū'ūn xohix 'a Topa yōg'ah. 'Āmhok. Topa te 'a xohix yīmōgatux'ah. ⁷ Yā Mōnāyxop hittap nām 'Amanām mōkputox, pāyā' yāg Topa hā yāy kutok xop. 'Ap xohix'ah. Yīy hōmā Topa te 'Amanām pu hām'āktux, hu: “'Āk-tok 'Iyak mōkputox yā 'āmōkputox xe'e', 'ap nōy xop 'ūm 'āmōkputox'ah. Yā' puknōg,” kaxīy. ⁸ Yīy Topa te 'Amanām mōkputox xohix 'ap putup'ah, pa hām'āktux xex 'Amanām mūtik hu: “'Āk-tok 'Iyak mōkputox, nō'ōm 'āmōkputox xe'e', 'āte xa hām'āktux xex hah,” kaxīy. ⁹ Tu hām'āktux xex, hu: “Hāpxip 'īhā' putpuk nūn'ax, ha 'āxetut Xat tek-tok put

putup,” kaxīy.

¹⁰ Ha 'Iyak xetut Hemek, tuk-tok pit 2 pop, ha' tak 'Iyak 'üp-xet, ¹¹⁻¹² pa Topa tek-tok puxet yāyikutnā tap, hak-tok 2 te' tut tex kopa tihi', 'ihā Topa te' tut pu hām'āktux, hu: “'Āk-tok hāmāxap te' taknōy pu' hām putup, tu' taknōy 'ūk-nāy tu' nāhā pu' hām putup,” kaxīy. Pa Topa te hām'āktux, 'ihāk-tok 2 te' tut tex kopa' tihi', tu hāpxopmā 'ohnāg, pe' māx, pe' kummuk, pa Topa te' yāyikutnā tap, ¹³ yīy Topa yōg tappet te: “'Āte Yako putup pax, tu 'Eyao putup nōg,” kaxīy.

¹⁴ Yūmū'āte putep 'āktux'ax? 'Ok Topa te hāpxopmā kohe'? 'Āmhok. ¹⁵ Tu Mōnāyxop Mōyyex pu hām'āktux, hu: “'Ātep-tup, nūy tikmū'ün 'üm kuxa ka', kopxi' kuxa ka'. Yā puxi',” kaxīy. ¹⁶ 'Ūyūmmūg. Topa te nōm tikmū'ün kuxa ka', 'ok pe tikmū'ün tep-tup, 'ok pep-tup hok, 'ok pe tikmū'ün te hāpxopmāhā', pe hāpxopmā hok, pāyā Topa te' kuxa ka'. ¹⁷ Topa yōg tappet te Pana'o hittap 'āktux, ha Topa te nōm pu hām'āktux, hu: “'Āte 'āxexkanāhā', nūy xa hāmyūmmūgā', xayīy 'ūgmūn ka'ok yūmmūg, puyīy hām xexka xohix yōg tikmū'ün tek xuxet'ax yūmmūg,” kaxīy. ¹⁸ Yīy Topa tep-tup, nūy tikmū'ün kuxa ka', puxi' kuxa ka', tup-tup, nūy tikmū'ün nōy kuxa māmā hok, puxi' mām 'ohnāg.

Topa te tikmū'ün kuxa ka', tu hāpkummuk hā' yānān kamah

¹⁹ Pa tikmū'ün te: “'Ok Topa te hāpkohe mīy, 'ihā tikmū'ün kummuk 'āktux? Topa te tikmū'ün kuxa māmā hok, puxix tikmū'ün kuxa mām

'ohnāg, Topa mūn tep-tup hah,” kaxīy. ²⁰ Nāy. Yāy pe'āpaxex xexka hok. 'Āk-tōgnāg, ha Topa mūn xexka xe'ēgnāg. Xate putōy putuk, nōm hā tikmū'ūn te nax mīy. Pax pu putōy te: “Tep tu xāhā nax?” kaxīy. ²¹ Nāy. Tikmū'ūn te putōy hā nax mīy, yā hāmyok miy, tu' nax hu' mīy, tu naxtox nūnnāp-tup, hu' mīy. 'Ūp-tup, hu' mīy, ha' yāg māynāg, xix 'ūnōy max miax.

²² Ha kaxīy Topa te hāmyok mīy. Tute' xohix pu' gāy yūmmūgāp-tup, pu' xohix Topa yā 'ūka'ok yūmmūg, yīy tikmū'ūn kummuk hā' tot, tu nōm koxyōy'ax. ²³ Tu' max xe'ēgnāg, tu yūmū'ā hāmmaxnāhā', tu yūmū'ā hāmyūmmūgāhā', 'ū yūmmūg. Yīy Topa te yūmūg kuxa ka', 'ū yūmūg yāyhā max xe'ēgnāg kamah, hamūn mūtik, ²⁴ tu yūmūg xānāhā', Yoneo yōg tikmū'ūn kopa 'ūyāg xānāhā', xi' puknōg xop kopa 'ūyāg xānāhā'. ²⁵ Hōmā 'Oyex te Topa pupi hām'āktux, tu tappet tu kax'āmi', hu:

“Āte' puknōg xop putup, yā yōgnū tikmū'ūn,
hōmā 'āte tu nōm xop putup nōg,
pāyā hōnhā nōm mō'yāy xe'ēgnāg.

²⁶ Ōnte Topa xe'ēgnāg te nōm xop pu hām'āktux tap,
tu:

'Yā 'āxop puknōg, 'ap yōg'ah tikmū'ūn, kaxīy.

Yā 'ōnte Topa xe'ēgnāg te yāy yōg tikmū'ūn 'āktux
putup,

yā Topa hi xe'ēgnāg,” kaxīy.

²⁷ Ha 'Iyait kama te Topa pupi ham'āktux, tu:
“Yoneo yōg tikmū'ūn xohix punethok yā 'āmot xap
xohix punethok putuk, pa 'ātek-tīgnāg yīmōgatux,
nūy kuxa kummuk xit, nūy kuxa max mō'tat

'Ûyãñã tu'. ²⁸ 'Ûgnũn mō'ka'ok, tu' hep xop xohix tu pagop-tup, tu' kummugãp-tup 'Ûyãñã tu,' kaxĩy. ²⁹ Hõmã 'Iyait te Topa pupi hãm'ãktux, tu: "Pax pu Topa xe'ëgnãg yũmũg mōkputox xohix kix, puxix yũmũ yōg kōmẽn te Xonõm putuk, xix Gõmõg putuk, yã' hok yũm," kaxĩy.

'Iyaet yōg tikmũ'ũn te hãm'ãpak max'ax 'ãpak

³⁰ Yũmũ'ãtep tep 'ãktux'ax? Nũhũ': Yã' puknõg te Topa xak ohnãg, tu hãpxopmã max hok Topa pu', pa Topa te' kuxa tupmãhã', pu tu kuxa max, 'ũkuxa mãm ka'ok tu', ³¹ 'Ihã Yoneo yōg tikmũ'ũn te Topa yōg xat'ax xak, nũy Topa pu' xat'ax hã yãy kuxa tupmã', tu' tupmã hok. ³² Tep tu' tupmã hok? 'Ûkuxa mãm 'ohnãg, tu hãpxopmã punethok, nũy yãyhã 'ũmax, hu' kuxa mãm 'ohnãg Topa kopah. Tu tikmũ'ũn putuk, nõm tikmũ'ũn te mĩkaxxap xexka yĩmũ hãm tu' nãhã', ha mĩkaxxap yĩmũ' nãhã'. ³³ Yã Topa yōg tappet te Kunnix 'ãktux, 'Ihã mĩkaxxap xexka 'ãktux, tu:

"Pẽnã! Yĩktix Xiãm tu 'ãte mĩkaxxap xexka mō'yũm, pu tikmũ'ũn hãm tu nã', mĩkaxxap te' kup hã' tak, ha' nãhã',

ha tikmũ'ũn kuxa yũm ka'ok mĩkaxxap kopah, puxix tu yãy pu' hũpmã hok," kaxĩy.

Yã tappet te Kunnix 'ãktux, nũy tikmũ'ũn kuxa mãm'ax yũmmũgã'.

10

¹ 'Ûkxape xop, 'ãte' xak, puyĩy yōgnũ tikmũ'ũn kuxa mãm ka'ok Yeyox Kunnix kopah, ha 'ãte Topa tu' xak pax tikmũ'ũn pupi', ² tu hãmyũmmũg, ha Topap-xehnãg xak, pa hãmyũmmũg 'ohnãg. ³ 'Ap

kuxa tupmā yūmmūg'ah, tu yāy pe'paxex hā yāy kuxa kummuk tupmāp-tup, pa Topap-xehnāg te tikmū'ūn kuxa tupmāhā', pu tu kuxa max. ⁴ Ha Kunnix nūn, nūy mīpkupnix tu' xok yūmūg pupi', puyīy tikmū'ūn kuxa mām ka'ok 'ōm kopah, puxix Topa' kuxa tupmā', pu tu kuxa max, yīy Yoneo xop hitop tu' xat'ax mīy. Yā' kuxa tupmā hok.

Topa te tikmū'ūn xohix kuxa kummuk xit'ax

⁵ Mōnāyxop hittap Mōyyex te' xat'ax 'āktux, hu: “Tikmū'ūn yīpkox pip 'ūxat'ax pu', puxi' xat'ax nōm hīnnāp-tup,” kaxīy. Ha kaxīy 'ūxat'ax te tikmū'ūn kuxa tupmāhā Topa pu', 'ihā tikmū'ūn te nōm pu' yīpkox pip, ha Mōyyex te tu' xuktux. ⁶ Pa Topa yōg tappet te hām'āktux nōy yā kamah, tu Topa te tikmū'ūn kuxa tupmā 'āktux, tu Topa te' kuxa mām ka'ok xop kuxa tupmā 'āktux, hu: “Ūyīpkopit hok, hu: “Ū 'ūm te pexkox tu' mōg putup, nūy yūmūg kuxa kummuk tupmā'?” ” kaxīy. Tu Kunnix nū'kutnā'ax 'āktux, yā' nūn tap, nūy yūmūg kuxa tupmā'. ⁷ Tu xe' yīkopit, hu: “Ū 'ūm te xakix xop pet ha' mōg putup, nūy yūmūg kuxa tupmā'?” kaxīy. Yā Topa te Kunnix putpu' hīnnā tap 'āktux. ⁸ Tu xe hām'āktux, hu: “Topa te hām'āktux, tu hām'āktux 'ūm mō'kutnāhā xa', ha 'āxop te hām'āpak, tu xe' xuktux, yā 'ākuxa kopa' xip,” kaxīy. Hak mū'āte Topa yōg hām'āktux'ax xa' xuktux, xayīy 'ākuxa yūm ka'ok Topa kopah. ⁹ 'Ok xatep-tup, pu Topa 'ākuxa kummuk xit, nūy kuxa max mō'tat 'ūyānān tu'? Xatep-tup, 'āpu 'ānōy pu hām'āktux, hu: Yeyox mūn yāk xuxyā! Kaxīy. Tu 'ākuxa yūm ka'ok Yeyox Kunnix kopah, Topa te' putpu hīnnāhā hah. Xate hāpxopmā kaxīy, puxix Topa 'ākuxa kummuk xit,

nŷy kuxa max tat 'üyänän tu'. ¹⁰ Yŷmŷg kuxa mām ka'ok, ha Topa te yŷmŷg kuxa tupmā', pu tu kuxa max, yŷmŷ'āte' yŷkox hā xuktux, puxix Topa yŷmŷg kuxa kummuk xit. ¹¹ Topa yōg tappet te: “Tikmŷ'ŷn kuxa yŷm ka'ok nōm kopah, puxix tu yāy pu hupmā hok,” kaxīy. ¹² Ha' hep xop xohix pu hāmmxnāhā', nōm xop kuxa mām ka'ok Topa kopah, tu Topa pu yāy putuk, Yoneo yōg tikmŷ'ŷn xi' puknōg xop. Topa yā yŷmŷg xuxyā', tu hāmmxnāhā 'ŷhep xop xohix pu', nōm xop te Topa tu' xak, pu hāmmxnā'. ¹³ Topa yōg tappet te xe: “Topa te' hep xop xohix kuxa kummuk xit putup, nŷy kuxa max yänän tu' tat, nōm xop te Topa tu' xak, pu' xit,” kaxīy.

¹⁴ Pa' hep xop punethok te ta tu' xak hok, 'ŷkuxa mām 'ohnāg tu', hu hām'āpak 'ohnāg. Tu hām'āpak hok, tikmŷ'ŷn te hām'āktux 'ohnāg hah. ¹⁵ Tu hām'āktux hok, tikmŷ'ŷn te mō'kutnā 'ohnāg hah. Topa yōg tappet te: “Yā' max tikmŷ'ŷn nŷ', nŷy hām'āpak'ax max āktux,” kaxīy.

¹⁶ 'A' xohix tep-tup'ah. Hōmā mōnāyxop hittap 'Iyait te Topa pupi hām'āktux, tu kax'āmi', tu: “Topah, pi'yā' yŷpkox 'ŷm pip 'ŷgmŷ'āte hām'āktux?” kaxīy. ¹⁷ Yīy tikmŷ'ŷn te Kunnix 'āktux'ax 'āpak hāmāxap, tuk-nāy tu' kuxa yŷm ka'ok nōm hām'āktux'ax kopah.

¹⁸ Pa 'āte xe' yŷkopit, hu: 'Ok tikmŷ'ŷn te hām'āpak hok? Hamŷn. Yā' xupak. Topa yōg tappet te: “Tikmŷ'ŷn xohix te' yŷy'ax 'āpak, yā hām xexka xohix yōg tikmŷ'ŷn te nōm hām'āktux'ax 'āpak.” Kaxīy.

19 Hak yīkopit, hu: “Ok Yoneo yōg tikmũ'ūn te hām 'ūm yūmmūg hok?” kaxīy. Yā' yūmmūg. Pa hōmā mōnāyxop hittap Mōyyex te Topa yōg hām'āktux kax'āmi', tu:

“Āte 'āyīpkumīygāp-tup, 'ūpuknōg xop hā
'āyīpkumīygāp-tup,
'ūpuknōg xop yā' hep puxet 'ohnāg, pāyā 'āte
'āyīpkumīygāp-tup,

Īhā puknōg xop yāyhā yōgnū tikmũ'ūn.

'Āte 'āgāyāp-tup nōm puknōg xop hah,
nōm puknōg xop pa te hāmyūmmūg 'ohnāg hā
'āte 'āgāyāp-tup,” kaxīy.

20 Ha mōnāyxop hittap 'Iyait kuxānōg 'ohnāg, tu Topa pupi hām'āktux tikmũ'ūn pu', tu:

“Nōm xop tek 'ūm xak hok, pak xipihī,” kaxīy.

21 Tu Yoneo xop 'āktux, hu:

“Āte tikmũ'ūn xānāhā', mō'yāy xe'ēgnāg tu',
pāyā' yīpkox 'ohnāg, xix hām'āpak 'ohnāg,” kaxīy.

11

Topa te 'Iyaet yōg tikmũ'ūn kuxa ka'

1 'Āte xe' yīkopit, hu: 'Ok Topa tep-tup hok yāy yōg tikmũ'ūn? 'Ūp-tup! 'Ūgmūn kama nōm Yoneo tikmũ'ūn yōg. 'Ūgmūn 'Iyaet yōg tihik, yāk mūn mōnāyxop 'Amanām mōkputox, xix Meyamīy yōg xop kopak xip. 2 Topa te Yoneo tikmũ'ūn putup hok'ah, tu nōm yīmōgatux tap. Hōmā mōnāyxop hittap 'Enit te 'Iyaet yōg tikmũ'ūn 'āktux kummuk Topa pu', 3 tu: “Topah, tikmũ'ūn te 'ōg tik xop kix, nōm xop te 'āmūn pupi hām'āktux, ha 'ōg mīmpe koxyōy, tu mīmpe hāpxop mō'hap'ax Topa pu' koxyōy, hak mūn puxehnāg xip, hak putex

putup kama nõmhã,” kaxīy. ⁴ Ha Topa te' yānān tu hām'āktux, hu: “Āte tik max xop xohix te 700 yīmōgatux, ha topa komut Mat pu nūktettex 'ohnāg,” kaxīy. ⁵ Yā hōnhã kaxīy kamah. Topa te tikmũ'ūn kutōgnāg xop yīmōgatux, tu nōm xop ha hāmmaxnāhã', tu' kuxa ka', ⁶ tu' yīmōgatux 'ūkuxa ka tu'. Pax pu Topa hāpxopmã max hã' yīmōgātux, puxix tu tikmũ'ūn kuxa ka hitop tu', pāyā Topa te' hok hã hāmmaxnāhã'.

⁷ Yīy Yoneo xop te' xak, puyīy 'ūxat'ax hã' kuxa tupmã Topa pu', pāyā' hitop tu' xak. Ha tikmũ'ūn kutōgnag Topa te yīmōgatux, nūy 'ūkuxa tupmã yāymūn pu', ha Yoneo nōy xop xexka te Topa pu' yīpkox 'ohnāg. ⁸ Topa yōg tappet te: “Topa te nōm xop putox ka'ogāhã', yā hōnhã hāmyūmmūg 'ohnāg,” kaxīy. ⁹ Ha Mōnāyxop Namix te: “Pūyā Topa 'ūyōg hāpxopmã'ax kummuk hã' pago. Pūyā yāy yōg kummūk'ax hã' kummuk xop mūg ka'ok.

¹⁰ Pūyā' pēnā hok, xix hāpxop xak'ax tu' hittupmã hok,” kaxīy.

¹¹ Āte xe' yīkopit. Yoneo yōg tikmũ'ūn te Kunnix putup nōg, yīy Topa te nōm pu hāpkummugāhã'. 'Ok Topa tep-tup hok? Yāp-tup! Pāyā Topa te' hip, pu tu' puknōg xop yīpkox pi', puyīy Yoneo yōg tikmũ'ūn yīpkumīy puknōg xop hã, nūy tu' yīpkox pi kamah Topa pu'. ¹² Yoneo yōg tikmũ'ūn te hāpxopmã kummuk, yīy Topa te' hep xop xohix ha hāmmaxnāhã', tu hāmmaxnāp-tup xexka', 'ihã Yoneo yōg tikmũ'ūn kama' yīpkox pip, 'ihã Yoneo yōg tikmũ'ūn punethok yīpkox pip hām'āpak max ta tu'. Yā Topa te' xohix te xīy mō'kupix, pu yīpkox pi'.

Topa te Yoneo xop hã' puknōg xop kuxa kummuk xit'ax

¹³ 'Āte' puknōg xop pu hām'āktux nōmhã. Topa te mōgkutnãhã' puknōg xop hah, pu hām'āpak max'ax 'āktux, hak kuxa hittup. ¹⁴ Pũyã Yoneo yōg tikmũ'ũn 'ūpuknōg xop pēnã', nũy kuxa mãm ka'ok yũmmũg, hu' yĩpkumĩy, yã 'āte' xak, pu' yĩpkumĩy, pu Topa 'ūkuxa kummuk xit, nũy kuxa max yãnãn tu mō'tat. ¹⁵ 'Ūpuknōg xop yãyhã Topa hã' xape', 'ĩhã Topa te Yoneo xop putup nōg, tu Yoneo yōg tikmũ'ũn xohix putup 'ūxeheh, puxix Topa' xakix xop putpu' hĩnnã'.

¹⁶ Tikmũ'ũn te pãm koxip, nũy Topa pu 'ōm yãg hōm, puxix pãm xohix Topa yōg. Tikmũ'ũn te yĩpxatit hōm Topa pu', puxix mĩm xexka kup kama Topa yōg, xix mĩmmãg kamah. Yã mōnãyxop hittap te mĩm yĩpxatit putuk, ha mĩmmãg te hōnhã yōg Yoneo xop putuk. ¹⁷ Mĩm xexka kup 'Onimet, tu hãmpak'ax xuka' yũm, ha' mĩmmãg 'um xak, ha 'Onimet kup puknōg tu mĩmmãg xut, 'ūkup te hãmhipak tu' yũm ha' xut, ha' mĩmmãg xut, nũy kup nōy putox tu' hĩy, pu tu tox, mĩmmãg nōy putuk. 'Āxop puknōg xop te 'Onimet puknōg putuk, Topa te xa hãmmaxnãhã', tu xa hãmmaxnãhã Yoneo xop putuk. ¹⁸ Yĩy Yoneo xop yãk-tōgnãg pe'āpaxeh hok: 'A 'āxop te yĩpxatit putuk'ah. 'Āmhok. Pãyã 'āxop te mĩmmãg putuk, yã mĩmmãg te' yĩpxatit tu' tup.

¹⁹ Pa 'āxop te: "Tikmũ'ũn te mĩmmãg xe'e' xut, nũy nō puknōg hĩy 'ūp-tox tu', pu tu tox. Ha kaxĩy Topa te yã yōg Yoneo xop mōy, nũy 'ūgmũg nōy hã' yãnãn, puk mũg yã yã yōg tikmũ'ũn, mō 'ūgmũg yãy xe'ēgnãg tu'," kaxĩy. ²⁰ Hamũn. Hãpxip

kutōgnāg 'ihā Topa tep-tup nōg, 'ūkuxa mām 'ohnāg hah, ha 'ākuxa mām ka'ok, yīy Topa te 'āp-tup pax, pa yāy pe'āpaxeh xexka hok. 'Ākuxānōg, ka 'ākuxa mām kux. ²¹ Hōnhā Topa te yāy yōg Yoneo xop putup nōg. 'Ākuxa te Topa nīm, puxix Topa kamah 'āp-tup nōg. ²² Topa te hāmyok mīy, tu tikmū'ūn kuxa ka kamah. Tu hāmyok mīy 'ihā tikmū'ūn kummuk xūygāhā', tu' yānān tu' kummugāhā', tu 'ākuxa ka', 'āyīpkox pip hah. 'Āyīpkox hok, puxix Topa 'āmōy kamah. ²³ Yoneo yōg tikmū'ūn te yāy putat kummuk nīm, nūy kuxa mām ka'ok Kun-nix kopah, puxix Topa' putpu' kuxa mām mā', yāy yōg xip'ax tu'. Ha tikmū'ūn te mīm māg xe'e hīy putpu', puyīy xip ka'ok. Kaxīy Topa te Yoneo xop mām mā'ax 'ūxeheh. ²⁴ 'Āxop puknōg, tu 'Onimet mīm māg putuk. Tikmū'ūn te mīm māg xut, nūy kup xe'e tu' hīy, pu tu' kup xe'e hā' mīm māg. Yoneo yōg tikmū'ūn te 'Onimet kup xe'e putuk, ha Topa te yā yāg putup nōg, tu' xep-tup'ax kamah, puyīy yāy mūn hā tikmū'ūn xe'e 'ūxeheh.

Yā Topa mūn max xe'ēgnāg

²⁵ 'Ūkxape xop, 'ūg'āpax: Hōnhā Yoneo yōg tikmū'ūn yīpkox 'ohnāg, pa hāptup nōy xohix 'ihā' yīpkox pip putup, 'ihā' puknōg xop xohix punethok te Topa yōg putat hā' mōg, ha Topa te' xohix te xīy mō'kupix, pu mōg. 'Āte xa hām'āktux'ax 'āktux, xayīy yāy yōg hāmyūmmūg pe'āpaxeh hok. Ha Topa te hām'āktux xe'e, nūy yāy yōg tikmū'ūn pu hāmyūmmūgā'. ²⁶ Tu Yoneo yōg tikmū'ūn xohix mōy putup, hāpkummugā'ax tu' mōy putup, yīy Topa yōg tappet te:

“Tik te yīktix Xiām tu' xip,
tu' nūn putup, nūy tikmū'ūn kuxa kummuk xit,
nūy Mōnāyxop Yako mōkputox
kuxa kummuk xit.

²⁷ Āte hāmpa'ax mīy putup tikmū'ūn mūtik,
'īhā 'āte' kuxa kummuk xit,
tu' kuxa max yānān tu' tat,” kaxīy.

²⁸ Yoneo xop te Topa hā' puknōg, hām'āpak
maxp-tup nōg tu', ha kaxīy 'āxop yā Yoneo xop'ah,
nūy Topa hā 'āxape', pa Topa te Yoneo xop
yīmōgatux tap, mōnāyxop hittap ha' yīmōgatux, tu
hām'āktux xex, hu: “Āte 'āmōkputox hāk xape mōg
kumak mōg, tuk kux 'ohnāg,” kaxīy. ²⁹ Topa te
Yoneo yōg tikmū'ūn yīmōgatux, tu mō'yāy xe'ēgnāg,
ha' hupmā 'ohnāg, yā Topa te' kuxyā 'ohnāg, tu
nōm hā hāmmaxnāp-tup. ³⁰ Hōmā 'āxop puknōg, 'ap
Yoneo xop'ah, 'āyīpkox 'ohnāg Topa pu', ha Topa te
'ākuxa ka', Yoneo xop yīpkox 'ohnāg ha 'ākuxa ka'.
³¹ Yā Topa te 'ākuxa ka', ha Yoneo xop yīpkox 'ohnāg
nōmhā, pu Topa kama nōm xop kuxa ka'. ³² Yā' hep
xop xohix yīpkox 'ohnāg Topa pu', yīy Topa te' hīy,
yāy yōg hāpxopmā'ax ha' hīy, ha Topa te' xohix kuxa
ka', pu' xohix tu' mūg.

Pūyā Topa max xe'ēgnāg 'āktux

³³ Topa te yā xohix ha hāmmaxnā xe'ēgnāg,
pexkox yōg hāpxop xexka xe'ēgnāg hā, ha
hāmyūmmūg xe'ēgnāg. 'A tikmū'ūn te Topa yōg
hāpxopmā'ax xohix yūmmūg'ah, nūy tu nōy pu'
yūmmūgā'. Āmhok. ³⁴ Yīy Topa yōg tappet te:
“Tikmū'ūn 'ūm te Topa yōg hāmpe'paxex
yūmmūg'ah,
tu Topa pu hāmyūmmūgā 'ohnāg,

35 tu Topa pu hāpxop hōm 'ohnāg kamah, pu tu ta nemēn,

nūy yānān tu' pago. 'Āmhok." Kaxīy.

36 Yā Topa-xet te hāpxop xohix mīy, tu hāpxop xohix hinnāhā', tu yāymūn pu' mīy, xix yāy pu hīnnāhā'. Yā Topa mūn xexka xe'ēgnāg. Pūyā tikmū'ūn te nōm xexka 'āktux mō kuma' mōg! Hamūn!

12

Āpu yūmū'āte Topa tu hāpxopmā'

1 Yīy 'āte xak xape xop xapit, xayīy Topaxehnāg pu yāymūn hōm, tikmū'ūn te hāpxop hok hōm putuk. Yā 'āxop te ta nemēn, Topa te 'ākuxa ka hah, xayīy nōm puxehnāg pu 'āyīpkox pi'. Yā Topa tep-tup pax. Hamūn. Yā kaxīy 'āxop te Topa pu nū'āktettex xe'e'. 2 Hām xexka tu' pip tikmū'ūn yā Topa hā' puknōg, yīy nōm pu 'īpkox hok, nūy yōg hāpxopmā'ax tat hok. Pa Topa te 'āp-tox maxnā'ax, xayīy Topa yōg putup'ax yūmmūg, nūy hāpxopmā max. Topa te nōm putup, yīy 'ā māynāg mīy Topa tu'.

3 Topa tek mūn ha hāmmaxnāhā', tuk ka'ogāhā', yīy xa hām'āktux, hu: 'Āmpe'āpaxeh max, nūy yāy yōg hāpxopmā'ax kopit max. Topa te 'ākuxa māmā ka'ok, xayīy 'āxop xohix hāpxopmā max, Topa te yā 'āxat hah. 4 Tikmū'ūn yīn puxet, tu' kup punethok, xix hāpxop te yīn kopa' pip punethok, xi' mīy'ax punethok. 5 Kaxīy yūmūg xohix punethok, pāyā yūmūg kuxap-xet Kunnix kuxa mūtik, yāk puxet, yā 'āyīn putuk. 6 Topa te yūmūg xohix ka'ogāhā', tu' hok hā ka'ogāhā', nūy hāpxopmā', tu' hok hā yāy yūmūg ka'ogāhā'. Tu tikmū'ūn puxet ka'ogāhā',

pu Topa pupi hām'āktux. Pūyā nōm tikmū'ūn hām'āktux, Topa te' kuxa māmā ka'ok hah. ⁷ Xix tikmū'ūn nōy ka'ogāhā', pu' nōy hā tu tehet. Pūyā nōm tikmū'ūn hā tu' tehet. Xix tikmū'ūn nōy ka'ogāhā', pu hāmyūmmūgā'. Pūyā hāmyūmmūgā'. ⁸ Xix tikmū'ūn nōy ka'ogāhā', pu tu' xape xop mō'nīynām, nūy ka'ogā'. Pūyā mō'nīynām. Xi' nōy ka'ogāhā', pu hāpxop hok popmā'. Pūyā' popmā', nūy tu' xupkumīy hok. Xi' nōy ka'ogāhā' pu tu' xat. Pūyā tu' xat max. Xi' nōy ka'ogāhā', pu tu' nōy kuxa ka', nūy tu hittupmā'. Pūyā tu hittup, 'ūnōy kuxa ka 'īhā'.

⁹ 'Āxape hā mō'āmā hok, pa nōm putup pax xe'e'. Hāpkummuk'ax putup hok, nūy tu hāmmāx xax, nūy hāpxopmā max mō kuma' mōg. ¹⁰ 'Āxop xohix Kunnix hā 'āxape', yīy 'āxop xohix hā yāy xape'. 'Āpu, yāy putup pax, nūy 'ānōy pe'āpaxeh xexkanā xip. ¹¹ Hāpxopmā max, tu tuknōg hok, nūy Topa pu hāpxopmā, 'ākuxa hittup tu'. ¹² 'Ākuxa hittup 'īhā Yeyox Kunnix nūn'ax hā' hip, tu hāpxopmā ka'ok hā' tot, nūy hāmmāx hip, xix Topa pu hām'āktux mō kuma mōg, yā' kux hok. ¹³ 'Āxupkumīy hok, tu 'āxape hok xop pu hāpxop hōm, xi' puknōg xop xānā', pu 'āpet kopa' mōy mō'xip.

¹⁴ Topa tu' xax, pu hāmmāxnā tikmū'ūn kummuk hah, nūy nōm xop te 'ākummugā xop ha hāmmāxnā', ha Topa tu' xax hok, puyīy nōm pu hāpkummugā 'ūyānān tu'. 'Āmhok. ¹⁵ Tikmū'ūn potaha', 'āpu nū yōkāmū poho kamah. Tikmū'ūn hittup, 'āpu nū mūtik 'āhittup kamah. ¹⁶ 'Ānōy mūtik 'āti max, ha yāy tukmīy hok. Yāy pe'āpaxeh xexka hok, pa' nōy te 'āxat'ax pu 'āyīpkox pī', nūy nōm pu 'āhām

max. Yäy pe 'äpaxeh hok, hu: Yä puxehnäg 'äte hämyümmüg. Kaxïy.

¹⁷ Tikmũ'ün te xa häpkummugã', 'äpu, 'äyänän tu häpkummugã hok. 'Äpu, häpxopmã max, puyï' xohix yümmüg, tu: "Häpxopmã max 'õhõm," kaxïy, nüy xa hãm'äktux max. ¹⁸ 'Üxax, nüy tikmũ'ün xohix mütik yäykix ta tu yäytuk-mïy 'ohnäg, nüy 'äxohix kuxa mämmã'. ¹⁹ Tikmũ'ün te xa häpkummugã', 'äpu 'üyänän tu' kummugã hok. 'Ämhok. Püyã Topa' kummugã', ha Topa yög tappet te Topa yög hãm'äktux 'äktux, tu: "'Ügmün yä Topah, tu häpkummugãp-tup 'üyänän tu', nüy tu pago," kaxïy. ²⁰ Ha Topa yög tappet te xa hämyümmügãhã', hu: "Tikmũ'ün te xa tu' gäy, tup-tup xüy, 'äpu, tu' hõm häpxop, puyï' mã'. 'Ügäy xop te kõnäg tat xak, 'äpu, kõnäg tat, nüy hõm, puyï' xo'op. Kaxïy xate' gäy xop kuxyãhã', pu yäyhãhup xexka', yã' payïn pukpex," kaxïy. ²¹ Tux hok, xa häpkummuk mïy hok, pa häpxopmã max, xayïy hämmax mïy.

13

Gohet yög tik xop pu 'äyïpkox pi'

¹ Püyã' xohix gohet pu yïpkox pi', nüy tik xop te tikmũ'un xat'ax pu yïpkox pi'. Yä Topa te' tux hok pu tu tikmũ'ün xat. ² Tikmũ'ün te gohet xop pu' yïpkox hok, puxix Topa pu' yïpkox hok kamah, ha Topa te nõm tikmũ'ün yög häpxopmã'ax kummuk kopit, tu' xüygãp-tup, pu tu pago. ³ Tikmũ'ün te häpxopmã max, puxix gohet yïpkutuk hok, ha tikmũ'ün te häpxopmã kummuk, puxi' yïpkutuk. Xatep-tup nüy 'äkuxänõg hok, 'äpu häpxopmã max,

puỹy tik te 'ãxat'ax 'ãmax 'ãktux. ⁴Õhõm te Topa pu' hãm, nõy xa hãmmxnã'. Xate hãpkummuk mĩy, 'ãpu 'ãxat'ax yĩpkutuk, tute 'ãxũygã'ax, xa tu pago. Topa te' xat'ax xop xat, pu' yãnãn tu tikmũ'ũn kummuk pu hãpkummugã'. ⁵Yĩy 'ãxat'ax xop pu 'ãyĩpkox pi', Topa te 'ãxat hah, 'ãkuxa te 'ãxat hãmãxap, ha 'ãxũygã hok kamah.

⁶Õg tayũmak hã pago kama gohet pu', gohet te nõm tayũmak xak hah. Yã' xat'ax xop te Topa pu hãpxopmãhã', ìhã 'ãxat. ⁷Hu pago tayũmak hã xate ta nemen, xix' xat'ax xop pe'ãpaxex xexka kama xate ta nemën.

Ãnõy ha hãmmxnã'

⁸Tikmũ'ũn pu ta nemën hok, pap-tup pax xexka'. Tikmũ'ũn te Topa yõg xat'ax mãynãg mĩy, ìhã' nõy putup pax. ⁹Õxat'ax te: “Ãnõy hã xupxet hok,” kaxĩy, xix: “Õp-tex hok,” kaxĩy, xix: “Hãpxop hã xupxet hok,” kaxĩy, xix: “Ãnõy yĩpkumĩy hok,” kaxĩy. Yã' xat'ax xohix te yũmũ'ã hãmyũmmũgãhã', ha hãmyũmmũg'ax puxet, hu: 'Ãnõy putup pax, yã yãy mũn putup pax putuk. Kaxĩy. ¹⁰Tikmũ'ũn te' nõy putup pax, puxi' nõy pu hãpkummugã 'ohnãg, yĩy tikmũ'ũn te' xat'ax pu' yĩpkox pip, ìhã' nõy putup pax xe'e'. ¹¹Ãpu, 'ãnõy putup pax. Yã hãptup xe'e mõ'nã'ax, puxix Kunnix nõ', nõy yãy yõg tikmũ'ũn yãy tu nõ'xok, 'ãkuxa tuknõg hok, nõy tikmũ'ũn mõ'yõn putuk hok. Yã hõmã yũmũg kuxa mãm ka'ok Yeyox kopah, ¹²pa yã hãptũmnãg, ha hãptup te hãpkanet hã mõ'nã'ax, ha kaxĩy yũmũg xuxyã xupep putup. 'Ãpu, yũmũ'ãte hãpkummuk mĩy kux, nõy 'ãmnĩy koxtap kopa yõg hãpxopmã'ax

kuxyā', nūy hāpkummuk mūtik yāy tuk-mīy māyōn xupep 'īhā'. ¹³ Yīy hāmyok mīy nōmhā, yāy xaptop hok. Hāpkute'ex kummuk hok, xix kenmuk xo'op hok, nūy 'āpaptux hok, xix 'ūpēnā pax hok, xayīy hāpkummuk mīy hok, xix 'ānōy hā xupxet hok, xix hāmpē'āpaxeh kummuk hok, xix yāykix hok, xix 'āyīpkumīy hok. ¹⁴ Yā yūmūg xuxyā Yeyox Kunnix te 'āpupi' xip, nūy 'āxeh, yī' tux hok pu xeh, ha yāy pu 'īpkox pip hok, nūy yāy yōg putup'ax mīy hok, ka hāpkummuk mīy.

14

'Ānōy yōg hāpxopmā'ax kopit hok

¹ Āxop kopa' pip tikmū'ūn kuxa mām pu'uk, 'āpu nōm putup pax, pa hām'āktux hā' nōy yānān hok, 'ūyōg hāmpē'paxex hā yāy tuk-mīy hok. ² Tikmū'ūn kuxa yūm ka'ok, puxi' xit'ax xohix māhā', pa tikmū'ūn kuxa yūm pu'uk te xogyīn mā 'ohnāg. ³ Tikmū'ūn yāg te hāpxop xohix māhā'. Pūyā' nōy mūn putup, nōm te xogyīn ma hok, nūy nōm pe'paxeh kutōgnāg hok. Tikmū'ūn yāg te xogyīn mā 'ohnāg. Puyā' nōy putup, nōm te hāpxop xohix māhā', pu nōm pe'paxex kutōgnāg hok. Topa te nōm putup pax, yā' puxi'. ⁴ 'Ok yāy pe'āpaxex xexka', nūy 'ānōy yōg kāmānat yōg hāpxopmā'ax kopit? Yūmūg xuxyā te' kopit putup, nūy hāmyūmmūg, 'ok pe kāmānat hām max, pe' hām kummuk. Yā' hām maxp-tup. Topa te' ka'ogā'ax, puyīy hāpxopmā max.

⁵ Tikmū'ūn yāg te hāptup tuknōg putup, 'īhā' nōy te 'āmnīy xohip-tup, ha 'āmnīy xohix te yāy putuk hamūn pu'. Pūyā tikmū'ūn kuxa xohix mām

ka'ok, nŷy hãmyũmmũg, nŷy yãy yõg hãpxopmã'ax yũmmũg, 'ok pe' max, 'ok pe' kummuk. ⁶ Tikmũ'ũn te hãptup tuknõg putup, puxix mõy Topa xexka 'ãktux, 'ĩhã nõm hãptup putup, ha tikmũ'ũn te hãpxop xohix mã', puxix Topa xexka 'ãktux, 'ĩhã hãpxopmãhã', hu: “Ãmax Topah, tu hãpxop xohix 'ã' hõm, nŷy 'ũkxĩnnã',” kaxĩy. Ha tikmũ'ũn te xogyĩn mã hok, puxix tu Topa xexka 'ãktux 'ĩhã' mã hok, tu: 'Ãmax Topah, xa hãm yõg hãpxop punethok 'ã' hõm, nŷy ũkxĩnnã',” kaxĩy. ⁷ Tikmũ'ũn puxehnãg hã 'ap hi'ah, tup-xehnãg hã 'ap xok'ah, pãyã Topa te yũmũg xat, 'ok pe yũmũg hi', pe yũmũg xakix. ⁸ Yũmũg hi, kopxix Topa tu yũmũg hi'. Yũmũg xakix, kopxix Topa tu yũmũg xakix. Yã kaxĩy, pe yũmũg hi', pe yũmũg xakix, kopxix Topa yõg yũmũ'ã'. ⁹ Kunnix xok, tu putpu' hi', nŷy tu yãyhã nõm hi xop yãy xuxyã', xi' xakix xop yãy xuxyã kamah. ¹⁰ Xix 'ãmũn, tep tu xate 'ãxape yõg hãpxopmã'ax kopit, nŷy hãpxopmã'ax 'ãktux kummuk? 'Ãnõy 'ãktux kummuk hok. Yũmũg xohix te Topa keppak pip putup, pu yũmũg yõg hãpxopmã'ax xohix kopit, nŷy hãmyũmmũg, 'ok pe yũmũ'ãte hãpxopmã max, pe hãpxopmã kummuk. ¹¹ Yĩy Topa yõg tappet te Topa yõg hãm'ãktux 'ãktux. Ha Topa te:

“Ãte xa hãpxe'e 'ãktux, tu xa hãm'ãktux xex:

Yãk hi mõkumak mõg,

yĩy 'ũhep xohix xop tek keppa nũktettex putup, nŷy
tu kuxa' yẽy,

tũtek mũn ha Topa xe'ẽgnãg 'ãktux putup,” kaxĩy.

¹² Yĩy yũmũg xohix te Topa keppak pip putup, nŷy yãy yõg hãpxopmã'ax 'ãktux.

Ānōy kummugā hok

¹³ Āxape kummuk 'āktux hok. 'Āmhok, hāpxopmā hok, nūy 'ānōy pu hāpkummugā hok, puyīy hāpkummuk mīy hok. ¹⁴ 'Ūgkuxap-xet yūmūg xuxyā kuxa mūtik, hu 'āte hāmyūmmūg, ha hāpxop xit'ax xohix max, 'ūyī' mā', pa tikmū'ūn yāg te: “Nōm te xokxop mā hok xop. Yā' kummuk tikmū'ūn te' mā',” kaxīy, puxix nōm xit'ax yā nōm tikmū'ūn hā 'ūmā hok. ¹⁵ Xate nōm hāpxop mā', hu ta 'āxape kuxa hittupmā hok, tu' kummugāhā', hu nōm putup nōg. 'Āxit'ax hā 'āxape pu hāpkummugā hok, ka tute Topa yōg putat xak. 'Ok yūmmūg xate'? Yā Kunnix te 'āxape pupi' xok, nūy nō hāmaxnā', pa xate' kummugāhā 'āxit'ax hā. 'Āpu 'ānōy kuxa putex hok! ¹⁶ Xate hāpxopmāhā', tu hāmpē'āpaxex, hu: “Yā 'āte hāpxopmā max,” kaxīy. Yā' max, pa 'āxape mūtik hām'āktux hok, nūy nōy yānān hok. Yā 'āxape te hāmpē'paxex nōy. 'Āyīy hok, xayīy 'āxape gāyā hok, ka 'āxape 'ōg hāpxopmā'ax kopit kummuk. ¹⁷ Topa te yāy yōg tikmū'ūn xat, tu tikmū'ūn kuxa tu' xat, tu putep mūn mā'ax 'ap xat'ah, xix putep xo'op'ax 'ap xat'ah. 'Āmhok. Topa te tikmū'ūn xat, pu max, tu' xat, pu tu kuxa yūm ka'ok, tu' xat, pu tu kuxa hittup xexka', ha Topa Koxuk te' kuxa hittupmā'ax, tu hāpxopmā'ax max hā' kuxa yūmmā'ax. ¹⁸ Ha tikmū'ūn te Kunnix pu hāpxopmā kaxīy, puxix Topa nōm 'ūmax 'āktux, ha tikmū'ūn xohix te nōm 'ūmax 'āktux kamah.

¹⁹ 'Āpu yūmū'āte hāxopmā maxnā', nūy kuxa yūmmā', nūy yūmūg xape ka'ogā'. ²⁰ Pa nūy ta nōy kummugā hok. 'Āxit'ax hā 'ānōy kummugā hok. 'Āmhok. 'Ōg pa 'āti!' 'Ānōy yā Topa yōg, ha

Topa te nōm putup pax, 'ūyōg hah, ha' kummugā hok, nūy 'āxit max. ²¹ Topa tep-tup tikmū'ūn te xogyīn mā hok, xix ta hep xupyāg xo'op hok, ka' nōy hā hāpkummugāhā'. ²² Xate hāpxopmāhā', tu' max pe'āpaxex, 'ākuxa yūm ka'ok, hu 'āxit, xi' xo'op, ha xate' yūmmūg, xix Topa te' yūmmūg. Puxi'. Tikmū'ūn kuxa yūm ka'ok yāy yōg hāpxopmā'ax kopah, puxix tu kuxa hittup xexka', ha' kuxa te yāy mūn tu: Yā' max. 'Āte hāpxopmā max hōnhā," kaxīy. ²³ Pa tikmū'ūn kuxa yūm pu'uk, tu yāy mūn yīkopit, 'ok pe' max, 'ok pe' kummuk, 'ū hāpxop 'ūm mā', puxix Topa' tux hok pu' mā hok, 'ūkuxa yūm 'ohnāg hah. Tikmū'ūn kuxa yūm pu'uk, 'ihā hāpxopmā', puxix hāpkummuk mīy, 'ūkuxa yūm pu'uk tu'.

15

Āpu, 'ānōy yōg putup'ax mīy

¹ Topa tek xat, 'ūyīy yūmūg xape xop mō'nīynām, nōm xop kuxa mām pu'uk mō'nīynām, nūy nō ka'ogā', nūy yūmūg yāy yōg putup'ax mīy hok. ² 'Ānōy yōg putup'ax mīy, nūy nōm ha hāmmaxnā', pu tu kuxa yūm ka'ok Yeyox kopah. ³ Kunnix te yāy yōg putup'ax mīy 'ohnāg, yīy Topa yōg tappet te Kunnix 'āktux, tu hām'āktux, hu: "Tikmū'ūn te 'ākummuk 'āktux, puxik mūn kummuk 'āktux kamah," kaxīy. ⁴ Hōmā tik xop hittap te Topa pupi hām'āktux, tu tappet tu kax'āmi', ha mō'yūmūg nīynām, 'ūyīy nōā'tot, ha Topa yōg tappet te yūmūg ka'ogāhā', 'ū Kunnix putpu nūn'ax hip. ⁵ Topa te 'āka'ogāhā', xix xa hā' totnāhā'. Pūyā Topa 'āxop kuxa puxetnā', xix 'āp-tox puxetnā kamah, xayīy Yeyox Kunnix yōg hāpxopmā'ax tat, ⁶ nūy Topa

yūmūg Tak max 'āktux, nūy 'āyīy'ax puxet hā Topa max 'āktux, yā 'ōhōm yūmūg xuxyā Yeyox Kunnix hā 'Ātak.

Yā hām'āpak max 'āktux Yoneo xop hā' puknōg xop pu'

⁷ 'Āpu, 'āxape putup, yā kaxīy Kunnix te 'āp-tup, tu mō'āyāy xe'ēgnāg. 'Āxape putup pax, pu tikmū'ūn te: “Topa mūn max xe'ēgnāg!” kaxīy. ⁸ 'Āte xa hāpxe'e 'āktux: Kunnix te Yoneo xop tu hāpxopmāhā', tu nōm xop ha hāmmaxnāhā', pu nōm xop yūmmūg, tu Topa te hāmyok mīy yūmmūg. Yā Topa te' yōg hām'āktux xex, tu mōnāyxop hittap pu' xex, tu' xaxok 'ohnāg, tu māynāg mīy. ⁹ Ha Kunnix te hāxopmāhā', pu' puknōg xop yūmmūg kamah, yā Topa te puknōg xop kuxa ka', puyīy Topa max 'āktux, yīy Topa yōg tappet te:

“Yā 'āmax Topah, yīy 'āte' puknōg xop pu hām'āktux putup,

tuk-tex putup, nūy 'āmax 'āktux,” kaxīy.

¹⁰ Tu xe hām'āktux, hu:

“Pūyā' puknōg xop kuxa hittup Yoneo xop mūtik.

Yā Topa te Yoneo yōg tikmū'ūn yīmōgatux,” kaxīy.

¹¹ Tu xe:

“Pūyā' puknōg xop xohix Topa xexka 'āktux,

pūyā' hep xop xohix Topa pu hām'āktux punethok,

nūy tu: “Āmax xe'ēgnāg,' kaxīy, Topa pu',” kaxīy.

¹² Ha mōnāyxop hittap 'Iyait te Topa yōg tappet tu kax'āmi', hu:

“Yexe mōkputox 'ūm nūn putup, nūy puknōg xop xat,

ha' hittup, tu' hip, pu mōkputox nū',” kaxīy.

13 Yā Topa te yūmūg kuxa hittupmāhā', pūyā 'ākuxa māmā, xayī' hip, Yā yūmū'ā' hōm putup pexkox yōg hāpxop xohix, ha yūmū'āte' hip, nūy pop. Yā Topa Koxuk te 'āka'ogāhā', xa hāmmax hip kamah, nūy pexkox yōg hāpxop tu pop.

Paot te hāpxe'e 'aktux

14 'Ūkxape xop, 'ūgkuxa yūm ka'ok 'ākopah, yā 'ākuxa max, tu hāmyūmmūg, ha 'āte 'āyūmmūg, ha hāmyūmmūg max, nūy 'ānōy pu hāmyūmmūgā'.
 15 Pa 'āte xa kax'āmi tappet, tu xa hāpxe'e 'aktux, tuk kuxānōg 'ohnāg, nūy xa xaxogā hok. Yā Topa tek yāyuktāhā', 'ū hāpxopmā nōm pupi', tuk hittup xexka'. 16 Yā hāpxopmāhā Yeyox Kunnix tu', nūy hāmpuknōg yōg xop mō'nīnām, tu Topa yōg hām'āpak max'ax 'aktux, 'āmānex putuk tu', puyī' puknōg xop kuxa mām ka'ok Topa kopah. Yā mō'yāy xe'ēgnāg, ha Topa Koxuk te nōm xop yīmōgatux, nūy Topa kuxa hittupmā'. 17 'Ūghittup xexka', Topa tu 'āte hāpxopmāhā', tuk kuxa hittup. Yāk kuxap-xet Kunnix kuxa mūtik. 18 'Ap 'ūgkuxānōg'ah, tu hām'aktux xe'e', nūy Kunnix te hāpxopmā'ax 'aktux, 'a 'āte hām'aktux nōy 'aktux 'ūm putup'ah, pa Kunnix 'ūgmūg 'ūm hā hāpxopmā ka'ok, puyī' puknōg xop kuxa mām ka'ok Topa kopah, 'āte hām'aktux, nūy hāmyūmmūgā', puyī' puknōg xop yīpkox pi Topa pu'. 19 Topa Koxuk te mōgkutnāhā', tuk ka'ogāhā', 'āte hāpxopmā xe'ēgnāg, puyī' puknōg xop pēnā', hak ka'ogāhā', 'ū hāpxopmā ka'ok xe'ēgnāg. Yā kaxīy tikmū'ūn 'ūm te' mīy hok, yīk xip Yenoyanēn tu', tuk mōg, tuk xupep hāpxexka 'Init tu', nūy hām'āpak max'ax xohix 'aktux, nūy Kunnix 'aktux. 20 'Āte

hāpxopmā punethok, nūy hām'āpak max'ax 'āktux, nūy Kunnix 'āktux puknōg xop pu', nōm xop te Kunnix 'āxet'ax 'āpak hok pu' xuktux, nūy nōy yōg hāpxopmā'ax mīy hok. 'Āte putup'ah, 'ūnōy te hāpxopmā hāmāxap, 'ūg-nāy tu hāpxopmā'.

²¹ Ha Topa yōg tappet te:

“Tikmū'ūn 'ūm te nōm 'āktux 'ohnāg, pāyā' puknōg te' pēnāp-tup,
ha hām'āpak 'ohnāg xop te hāmyūmmūg putup,”
kaxīy.

Paot te kōmēn xexka Hōm tu' mōg putup

²² Āmnīy xohix hā 'āte' xak, nūy 'āhak mōg, pāyāk mōg'ah. ²³ 'Āte hāpxopmā kux nūnte, kopxix 'āhak mōg. Yā 'āte' hip hāmyāxatamuk xohix hā, 'ūg 'āha mōg. ²⁴ Huk mōg putup nōmhā. 'Ūgmōg putup hāpxexka 'Expān hah, tu 'āp-tup, xa mōgnīynām, 'ūyīy 'Expān tuk mōg, tu 'āxop mūtik 'ūkxip putup hāmāxap. ²⁵ Hōnhāk mōg Yenoyanēn tu', nūy Topa yōg tikmū'ūn tu hāpxopmā'. ²⁶ Yā hāpxexka Māxenōn yōg kuxa mām ka'ok xop, xix hāpxexka Genex yōg kuxa mām ka'ok xop te tayūmak pop, nūy Topa yōg tikmū'ūn pu' popmā Yenoyanēn tu', nūy hok xop pu' popmā'. ²⁷ Nōm kuxa mām xop te' popmāp-tup, nūy hok xop pu' popmā'. Yā' max 'ū popmā', Yoneo xop pu' yānān tu' popmāhā'. Yā Yoneo xop te' puknōg xop ha hāmmaxnāhā', yī' puknōg xop te tu ta nemēn, nūy yānān tu' hok xop pu hāpxop popmā'. ²⁸ 'Āte hāpxopmā kux, kopxi' hok xop pu hāpxop popmōg, tu 'Expān hak mōg putup, tuk mōg putat hā, kopxix 'āhak mōg kamah.

29 'Ūgmōg, nūy 'āha hāmmaxnā', pu Kunnix 'āha hāmmaxnā xexka'.

30 'Ūkxape xop, 'āte 'āxapit, yūmūg xuxyā te mō yūmūg yāy xe'ēgnāg hah, xix Topa Koxuk te mōgyāy hah, xa mōgnīynām, nūy Topa puk 'āktux nām, puk mūn ka'ogā', 31 tuk pēnā max, tuk mōgnīy, puyīy Yoneo yōg kuxa mām hok xop tek kummugā hok. 'Āpu, Topa tu' xax kamah, puyīy Yenoyanēn yōg kuxa mām ka'ok xop 'ūgputup, 'āte hāpxopmā max hah. 32 Topa tek putup, kopxik mōg 'ūm 'āhah, tuk hittup xexka', nūy 'āmūtik 'ūktihi', nūy 'āmūtik 'ūghittup. 33 Pūyā Topa 'ākuxa mām mā', xix 'āmūtik tihī'. Hamūn!

16

Paot te' xape xop pu 'āneo

1 Pep yā yūmūg xape hex, tu' max, tu kōmēn Xēnkenex yōg kuxa mām ka'ok xop pu hāpxopmāhā', tu' hok xop pu hāpxop popmāhā', 2 yīy nōm putup, nūy nō tu 'ātehet, yā yūmūg xuxyā 'ūyōg kamah. Pūyā' xohix hā tu' tehet, yā tikmū'ūn punethok hā' xape, xik mūn hā' xape'. 3 'Āte Pinixit xix 'Ak pu 'āneo hōm, yāk mūn mūtik Topa tu hāpxopmāhā', tu yāk mūn hā 'ūkxape xe'e'. 4 Tu 'ā' xok'ax, yīy 'āte nōm pu: 'Āmax xe'e', kaxīy. 'Āte' puknōg xop yōg kuxa mām ka'ok xop xohix mūtik hām'āktux, hu: 'Āmax xe'e! Kaxīy. 5 'Āte' kuxa mām ka'ok xop pu 'āneo hōm kamah, nōm xop te 'Ak pet tu yāy tu nū'nāhā'.

'Āte 'Ēpēn pu 'āneo hōm kamah, hak mūn hā 'ūkxape', tu 'Ax yōg tik te māxap, nūy kuxa yūm Yeyox kopah. 6 'Āte Mānix pu 'āneo hōm, ha 'āxop

pu hāpxopmāhā punethok. ⁷ Xix 'Ānenōn xix Yōn pu 'āneo hōm, ha kama Yoneo yōg tihik, 'ūgmūn putuk, tuk mūn mūtik pip kanet kopah. Yeyox yōg mō'pok xop te' yūmmūg max, ha' kuxa mām ka'ok hāmāxap, hak-nāy tuk kuxa yūm ka'ok kamah.

⁸ 'Āte 'Āpit pu 'āneo hōm, hak mūn hā yā 'ūkxape' xe'e, yāg mūg kuxap-xet yūmūg xuxyā kuxa mūtik. ⁹ Xix 'Ohmān pu 'āneo hōm, hak mū mūtik hāpxopmāhā', tu Kunnix tu hāxopmāhā', xix 'Extak pu 'āneo hōm, hak mūn hā 'ūkxape xe'e'. ¹⁰ Xix 'Apet pu 'āneo hōm, yā Kunnix tu hāpxopmā xexka', ha tikmū'ūn te' yūmmūg. Xix 'Anixtop pet kopa' pip xop pu 'āneo hōm. ¹¹ Xix 'Enoniām pu 'āneo hōm kamah, ha Yoneo yōg tik kamah, xix Nāxix pet kopa' pip xape xop pu 'āneo hōm kamah.

¹² Xix Tinipēn xix Tinipox pu 'āneo hōm, yā Topa tu hāpxopmāhā', xix Pex, hak mūn hā 'ūkxape', tu yūmūg xuxyā tu hāpxopmāhā xexka'. ¹³ Xix Hop pu 'āneo hōm, yā hāpxopmāhā xexka Topa tu', xi' tut pu 'āneo, yāk mūn hā yā' tut. ¹⁴ 'Āte 'Axīn pu 'āneo hōm, xix Penegōn pu' hōm, xix 'Ehēm pu' hōm, xix Pa'ot pu' hōm, xix 'Ehām pu' hōm, xix yūmūg xape xop te' pet kopa' pip pu 'āneo hōm. ¹⁵ Xix Pinot pu 'āneo hōm, xix Yonit pu' hōm, xix Neneo pu' hōm, xi' hex pu' hōm, xix 'Onīm pu' hōm, xix Topa yōg tikmū'ūn xohix pu 'āneo hōm, nōm te' mūtik pip xop pu 'āneo hōm kamah.

¹⁶ Yāy kep ha yāy mūg, nūy tu 'āneo. Yā Kunnix yōg tikmū'ūn xohix te' āxop pu 'āneo hōm.

Paot te hāmyūmmūgāhā'

¹⁷ 'Ūkxape xop, 'āte xa hām'āktux: 'Og pa mōxip! Tikmū'ūn kummuk te xa hām'āktux hā' nōy

yānān, puyīy 'āgāyā', puyīy yāy xakot, ha Topa yōg hām'āktux yūmmūgā kummuk. 'Āpu, 'ūnīm nōm kummuk xop. ¹⁸ Tikmū'ūn te hāpxopmā kummuk ha xīy, puxix Kunnix yūmūg xuxyā tu hāpxopmā 'ohnāg, pāyā hāpxop xak, nūy xit. Tu hām'āktux māynāg, nūy yā tikmū'ūn pu mō'āmā', nūy tikmū'ūn hāmyūmmūg hok xop pu mō'āmā'. ¹⁹ Tikmū'ūn xohix te 'āyīpkox pip'ax yūmmūg, ha hām'āpak max'ax pu 'āyīpkox pip, 'āyīy xa tuk hittup, tup-tup, xa hāmyūmmūg, nūy hāpxopmā max, pāyā 'a 'āte putup'ah, xa hāpxopmā kummuk yūmmūg. 'Āmhok. ²⁰ Topa te yūmūg kuxa māmāhā', tu hāpxip kutōgnāg 'Īhā Hāmgāyāgnāg koxyōy putup, pu 'āxop totnok nām, tu' nōā'.

Pūyā yūmūg xuxyā Yeyox xa hāmmaxnā'!

²¹ Tīmōn tek mūtik hāpxopmāhā', tu xa 'āneo hōm, xix Noxit, xix Yaxām, xix Xoxit, te 'āneo hōm kamah. Nū tik xop xohix Yoneo xop, 'ūgmūn putuk.

²² 'Ūgmūn Tex, tu Paot pupi tappet kax'āmi', tu 'āxop pu 'āneo hōm, yāk mūn Kunnix yōg, 'āxop putuk.

²³ Xix Gax te 'āneo, hak mūg pip Gax pet tu', ha' kuxa mām xop te nū pet tu ta tu yāy tu nū'nāhā', tu nū'āktettex. Xix 'Enax te 'āneo, ha kōmēn yōg tayūmak xex, xix Koat te 'āneo, ha yūmū'ā hā' xape'.

²⁴ Pūyā yūmūg xuxyā Yeyox Kunnix 'āxop xohix ha hāmmaxnā'! Hamūn!

Paot te Topa xexka xe'ēgnāg 'āktux

²⁵ 'Āpu yūmūg Topa xexka 'ūm 'āktux! Tu 'ākuxa māmā'ax ka'ok, xayīy 'ākuxa mām ka'ok mō' kuma' mōg. Yā hām'āpak'ax te' xuktux, 'āte nōm

te xa' xuktux, tu Yeyox Kunnix xa' xuktux. Hõmã Topa te hãpxaptop, ²⁶ pa hõnhã hãmyũmmũgãhã', tu tik xop hittap hã' yũmmũgãhã', nõm xop te Topa pupi hãm'ãktux, tu tappet tu kax'ãmi', pu Topa yõg tikmũ'ũn hãmyũmmũg, ha Topa hi xe'ëgnãg mõ kuma' mõg, tu' xat, pu' hep xop xohix pu' xuktux, pu hãm xexka xohix yõg tikmũ'ũn pu' xuktux, puyĩ' xohix yĩpkox pi', xi' kuxa mãm ka'ok hãm'ãpak max'ax kopah.

²⁷ Topap-xehnãg, 'ũnõy 'a' ti'ah, ha hãmyũmmũg xe'ëgnãg. Pũyã' xohix Topa xexka xe'ëgnãg 'ãktux, Yeyox Kunnix ha hãm'ãktux.

Tu ta tu' kux.

Topa Yōg Tappet
New Testament in Maxakalí (BR:mbl:Maxakalí)

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022
a212b59e-62d7-5a38-9773-b0ce1d5b248b